


7

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
JAN 30 1994

T5428/2362





甌甌洞藁詩集目錄

卷之一

樂府

古歌謠八首

黃澤辭

穆天子謠

采葛婦歌

烏孫公主歌

鼓吹鏡歌十二首

聖人出

白雲謠

越人歌

紫芝歌

雞鳴歌

捉搦歌三首

折楊柳歌四首

江南曲二首

挽歌

對酒

吟歎曲二首

王明君

王子喬

平調曲四首

短歌行

燕歌行

君子行

從軍行

清調曲二首

苦寒行

塘上行

瑟調曲一首

隴西行

楚調曲一首

白頭吟

清商曲 吳聲歌十首

子夜歌八首

同生曲二首

西曲歌十二首

烏棲曲四首

莫愁樂二首

襄陽樂四首

白紵舞歌二首

琴曲一首

別鶴操

雜曲七首

悲歌

妾薄命

羽林郎

名都篇

美女篇

白馬篇

蘇小小歌

雜擬六首

權歌行

銅雀臺

銅雀伎

關山月

昭君辭

當壚曲

雜歌謠十四首

戚將軍歌爲閩中父老作

西晃謠爲塗人思石將軍作

止戈謠爲黔陽諸夷民戴吳總戎作

四言古九首

偶書八首

謁文昌祠

五言古二十七首

述志四首

雜詩十二首

賜宴思親

過嚴子陵釣臺

哀江南

張子培至自吳

登廬山絕頂

郊行

遊仙篇贈劉叟

秋夜獨酌

梁園吟

舟中望嶧山

悼亡詩

八子詩

李學憲獻吉

何學憲仲默

徐博士昌穀

邊尚書廷實

鄭司封繼之

王檢討敬夫

王吉士稚欽

高按察叔嗣

四子詩

王元美

宗子相

徐子與

梁公實

登武夷山二首

泛九曲谿二首

懷元美二首

秋夜同周子徵珠江泛月

夏夜偶涼卽事效梁人體

輓梁思伯

謁于少保廟

贈張子元

梧塘山居喜羽王京兆

過訪

酬孫兆孺

園居

贈金將軍

偶書三首

遊燕子磯同行甫仲美

賦

七言古十五首

越女行贈友人新婚 景州塔

鄧母張太孺人七十壽

齋中木槿盛開感而有賦

穎川值雪有作 次廩延得周方伯書謂

新釀且熟待予發興輒賦短歌報之

羽王爲我題葡萄卷走筆謝之

謝羽王送猫 江上有聞與行甫醉歌

侯憲使邀同仲美遊峴山因過習家池酒間漫

賦

觀黃鵠畫馬歌 富口發舟東行四十里

遇大風折舵幾覆復平與仲美醉歌

吳中醉歌與羅伯符 閶門別吳叔嘉短歌

悼陳光州貞父詩

甌龔洞藁詩集卷之一

武昌吳國倫著

始安張鳴鳳校  
新安方尚贊校

哈佛大學漢和  
圖書館珍藏印

樂府

古歌謠八首

黃澤辭

黃之沮其馬汗珠皇人穆如黃之澤其馬汗血皇人  
為烈

白雲謠

白雲在天閭闔未閱遠以萬里川際間之將顧見子  
曷維其期



穆天子謠

予將東歸撫有諸夏諸夏用康爰適我所期以三年  
俟子于野

越人歌

今日之日兮新波中流載我王子兮青翰之舟宴罷  
樂極兮八音齊止獨擁楫而心悲兮歌向王子山有  
柏兮柏有柯心知君兮奈君何

采葛婦歌

以薪不勞袒若茵今我采葛以作綸

紫芝歌

悠悠南山巖壑窅窕英英紫芝可以宿飽堯舜難逢  
從吾所好錦衣肉食其憂孔熾美玉之旣雕兮孰與  
大璞之完質

烏孫公主歌

爰毋育我兮一何親天子嫁我兮冒胡塵水草爲居  
兮畜爲鄰腥羶爲食兮毳爲衾黃鵠高舉兮厲秋旻  
我思故國兮歸無津

雞鳴歌

東方欲曙星皎皎雞人登壇望八表三唱傳呼曲未  
終月散鐘鳴天下曉重城萬樹鳴烏鵲六宮竝奏鈞

天樂

鼓吹鏡歌十二首

聖人出

聖人出天下平甘露降黃河清御六龍權奇哉披黃  
圖壯九垓君得臣保金鏡臣得君贊神聖日月光華  
四時和千秋萬歲奈樂何

捉搦歌三首

雨雪雖寒尚可裘江漢雖廣亦可舟男兒賭命博封  
侯老女不嫁常低頭

金鍼巧刺鴛鴦線寶匣雙韜鹿盧劍花間男女一識

面脉脉還家兩相怨

玉井蓮開五色花千峯萬峯飛彩霞長安女兒嬌自  
誇不嫁城中第二家

折楊柳歌四首

上馬搦柳條垂絲可作鞭下馬奏胡笳哀音使人憐  
侵晨煮芻豈馬飽蹠跋走願作柔絲韁宛轉隨郎手  
庭前梧桐樹一日三摩挲老女不嫁夫唧唧怨阿婆  
阿婆聞女聲問女何所怨去年裁嫁衣今年色已變

江南曲二首

江南行採蓮蓮露如珠瀉白鳥翔其上遊魚戲其下

江南行採蓮蓮花耀朝日素腕刺船來朱唇唱歌出

挽歌

天地有時合晝夜渾茫茫人生渺如寄勿論彭與殤  
生當列屋居死從九陰藏黃墟為君宅白石為君墻  
狐狄為四鄰蝼蛄穴中央賢愚與貴賤遺形諒相當  
安見人魚膏久照驪山光

對酒

對酒歌太平君相賢且明關塞息傳箭朝廷行寢兵  
鹿臺恩已溥泉府貨仍盈五土無苛政三農有深耕  
侯官却走馬少年恥文纓遺路金誰拾當關夜不驚

今日良宴會上都佳麗城分曹出趙舞合奏揚秦聲  
滿浮琥珀漿痛醉碑礫罌當歌不為樂無乃非人情

吟歎曲二首

王明君

妾本良家子垂髮入漢宮六年處金屋形影依房櫳  
倉皇應明詔萬里遠和戎上殿辭我主只尺意未通  
下殿引節旄含悲出銅龍轅馬逝如駛琵琶曲難終  
嗚咽隴頭水縣流各西東駸駸入穹廬憤悒填心膺  
闕氏美我名胡母分亦崇異俗非所安旃裘難為容  
何當有羽翼南征從北風微軀不自保滄淚瞻飛鴻

昔若盤中珠今爲水上蓬前朝烏孫主遺恨良相同  
紅顏故薄命豈必由畫工

王子喬

王子喬白日駕鶴雲中遊綠玉如意青鳳裘王子喬  
白日駕鶴雲中遊橫絕四海無九州浮雲輕舉緱山  
顛桑田滄海俱悠悠朝發黃帝之赤館暮宿五城十  
二樓西觴王母東揖浮丘玉女羅吹笙八璫應鳴球  
雝雝喑喑和律呂鳳皇之聲天外流三王五霸俱殂  
落今皇神聖方垂旒願以神芝圖爲君卜天休延年  
國千萬秋

平調曲四首

短歌行

對酒當歌人壽幾何晝短夜長樂少憂多一解何以忘  
憂桂醕蘭漿何以爲樂吹笙鼓簧二解黃鳥求友其鳴  
嚶嚶我有所思胡不屏營三解鶴鳴在陰其子和之鹿  
鳴在野嘉賓樂之四解顧瞻四方殷憂孔繁相彼鷦鷯  
一枝可安五解儀狄以疎南威以絕式我先民令儀盜

德六解

燕歌行

商飈習習清露漙漙羣芳銷歇秋氣寒鴻鴈連翩思故

關林月皎皎烏未安念君遠遊路漫漫萬里何時當  
來還空房蟲鳴起長歎仰視明河夜闌干援琴當窓  
操幽蘭哀絃激響摧肺肝同心寶燭鏤金盤朱光明  
滅羅衣寬晨風一舉翔雲端我獨何爲乏羽翰

君子行

君子尚高節不處塵壒間暑不休惡木渴不飲貪泉  
薰蕕不竝器鳳鷲不齊騫於世無磷緇堅白益以完  
宣父大聖人闕里何多賢一言百世師耿耿流遺編

從軍行

慷慨事西征將士亦何武厲馬奮先登戈矛集如雨

前旌亂浮雲流飈捷飛羽一舉恢故疆三旬迄寧宇  
獯夷走乞降氏羌無跋扈天威戒深入完師伐鷺鼓  
陳賞不踰時營中夜歌舞氍毹藉爲茵牛羊磔爲脯  
往來未愆期齊聲頌明主解徒詠東山論功裂茅土  
勞微願已足從軍良不苦我獨操鉛刀逢時愧無補

清調曲二首

苦寒行

驅車上太行路險雪苦深不辯羊腸坂暗谷排千尋  
北風振巖柯白日忽以陰豺虎據路蹊惡鳥鳴前林  
輪摧馬骨穿艱哉何滯淫鬱鬱思東歸太息復沈吟

卷一  
言集卷一  
六  
徒御飢且寒倉皇迷故津欲渡梁既絕攀樹樹亦冰  
詠彼黃竹辭漫漫傷遠心

塘上行

蒲生我池中根短葉何長誰獨無仁義甘苦妾自當  
風波起眉睫含悲下君堂銷骨豈無端愛憎亦何常  
日夜苦念君悲風感搖落踣履尚可求著簪尚可著  
豈以珠玉麗而忘裘與褐豈以牛羊肥而忘葵與藿  
生亦常苦悲死亦常苦悲反顧別時路藜藿何離離  
從君歸故室百歲以爲期

瑟調曲一首

隴西行

隴西走馬客出入天水關白榆間青桂夾道何漫漫  
下馬投舊主舊主出未還新婦解肅客美態柔且閑  
手捉桃枝扇耳辨明月環絢綺爲下裙紫綺爲上衫  
登堂行拜跪振佩鳴珊珊問客從何來得無久平安  
請客坐上坐席布青琅玕盼笑未須更中厨出雕盤  
清酒起自酌爲壽跪客前客言主當酬微飲不及乾  
左顧屬侍子何當留客歡取我牀頭瑟調絃一再彈  
短歌中律呂餘芳噴幽蘭客起再拜謝何當此盤桓  
罷酒送客出樂極容愈端客行猶反顧一顧三長歎

得婦有如是宋子安足攀

楚調曲一首

白頭吟

赤若沙中金皚若璞中璧剖心何難見與君不終席

解一昔聞鳳求皇今若參與商三辰有晦蝕琴心亦何

常解二紅顏不再駐白首難爲期一日相決絕含辛當

告誰解三著薪日以采著簪日以忘新故豈相及顧瞻

獨徬徨解四南山勿言高但與北山齊願得新人歡莫

如舊人啼解五魚尾何筵筵釣竿何珊珊蜀水下三峽

那能復西還解六

清商曲 吳聲歌十首

子夜歌八首

新挽垂肩髮梳成墮馬妝五絲繚玉簪可知歡殺郎

愛殺金芙蓉出水不見藕但識蓮子心花下爲歡剖

郎持木蓼燭照妾織流黃終夜但成匹何辭克下裳

郎歌妙意曲儂起彈清琴安得連理樹一夜長成林

特底小唐突如嗔忽作喜風吹桐花香誰不憐梧子

郎行轆轤心無時自轉動妾若衡下錘隨郎作輕重

架上金羊燈雙照茱萸幔歡來就儂嬉光輝兩相盼

錢刀足何用玉容難可買甘露澆黃蘗苦心終不解

同生曲二首

人生忽如寄多營即多憂安得龍銜燭照爾地下遊  
鐘鼓日可考車馬日可馳惜費不為樂徒為他人資

西曲歌十二首

烏棲曲四首

百花滿庭香滿室城上烏棲月初出燭下紅粧耀錦  
屏玉指調弦郎自聽

沙棠為楫蘭為橈溪水照面芙蓉嬌落日徘徊望江  
路今夜風波郎莫渡

長檣大艫百幅帆辭家歲歲遊江南書來但道江南

樂我獨何為臥空閣

博山鑪蕪水沈香明月夜夜懸空牀郎心轉動如車

軸酒家買醉倡家宿

莫愁樂二首

家對石城樓門前溪水流何處冶遊子低聲喚莫愁  
少年且勿喧但聽莫愁歌可憐今夜月如此莫愁何

襄陽樂四首

襄陽諸女兒自負傾城色逢郎大堤南蹋歌大堤北  
大堤十五女臨街學數錢何當估酒客調笑酒壚邊  
女蘿附長松不自知微薄因郎歲寒姿綢繆永相託



大估揚州還索儂大堤間千金取一笑何用蒲鍛環  
白紵舞歌二首

吳宮新裁白紵衣皎若集羽凌煙霏璫篔初施蘭氣  
微霞綃霧縠流光輝纖姿妙舞二八姬含情宛轉出  
緹幃雙舉素腕趨絃微巾袂綽約輕雲飛將傾忽竦  
隨天機懸釵不墮鬟乍低抗身矯履騰金屣超絕一  
世和者稀羣娃玉指不住揮繁聲急節相因依明星  
在天露未晞嘉賓但醉且勿歸

趙姬起舞吳姬歌綺琴瑤瑟旋相和長袖輕舉步婀娜  
當筵轉盼生橫波將進復止揚素蛾迴鸞縱鶴影

婆娑怨若湘妃鼓江沱矜若牛女會天河應聲合節  
跼且摩僂僂洩洩傾陽阿曲終得意還自哦餘態徘徊  
拭纖羅華燈秉照玉樹柯三陽駸駸逐羲和尊中  
有酒旨且多主君今夕奈樂何

琴曲一首

別鶴操

羽翼將分兮風蕭蕭浮雲颯沓兮天路遙終夜哀鳴  
兮誰爲招

雜曲七首

悲歌

肉食不如稻粱錦衣不如故鄉遠道思歸鬱紆徬徨  
欲駕車無輓欲娶妻無媒可憐徑寸腸一夜常九迴

妾薄命

三辰麗天何私同心膠漆何疑華燈光舒陸離與君  
皓首爲期君自援琴調絃妾亦起舞僊僊變聲一鼓  
幽蘭垂手墮髻承歡自信海枯嶽摧烏白馬角無垂  
珠環翠鈿徘徊曲體常見憐哀穠襜賓客在堂逡巡  
秉燭行觴遺履絕纓踉蹌妾獨御中君傍陰陽浩浩  
潛移容華銷落難持風波瞥起差池荆棘坐蔓房幃  
殘桃無味可咀釣多中棄前魚班女題統歛歎鄭姬

掩鼻誠愚亦有昭君細君宮容遠冒胡塵蛾眉誨愛  
誨嗔苦樂豈盡由人人聞新故何常薄命纍纍下堂  
恩深已絕難忘短歌微吟自傷

羽林郎

羽林良家子盛氣憑金吾鳴鞭出狹斜顧問酒家胡  
胡姬年十五妖閑自當壚何言邯鄲倡頗擬秦羅敷  
輕裙芙蓉帶單衫繡袂襦雙鬟倭墮髻珊瑚間青珠  
肆中焚椒蘭席上陳笙竽千鍾與百榼上客無停酌  
獨有羽林兒下馬何踟躕直入坐我傍白皙美頰腴  
但坐不通名調笑復須臾肴來錯金盤酒滿鏤玉壺

微飲不及酣縱歌聊自娛遺我朱雀錦曳我連理裾  
裾輕故可斷錦重非其愉上客豈無婦胡姬亦有夫  
感君屬慙慙清濁難相渝金吾貴自貴母煩私賤軀

名都篇

名都故佳麗少年何翩翩千金飾寶劍百金縲文鞍  
臂鷹走東郊戲馬過上蘭力能嚙飛鏑巧能承弄丸  
馳騁不言勞角觝相更端雙隼從何來疾風翔雲間  
滿引明月弓厲鏃忽應弦一矢貫雙隼馬驟不及鞭  
觀者稱神奇狐兔不敢前暮入胡姬肆挾瑟當爐彈  
清酒滿玉壺珍肴羅翠盤密坐屬所私一博呼十千

旁若無世人意氣矜相憐出門夜未旦白露何漫漫

美女篇

美女出京洛麗質閑且都盛年處重幃足不踰門樞  
晨起開新妝厭粉不施朱簪以九華玉瑱以大秦珠  
屣履應鳴環微風蕩羅裾理絲織縑素經緯良獨殊  
手調文梓瑟緩急諧謳趨舉體若織雲吐氣蘭不如  
聞者相豔慕觀者但嗟吁媒氏亦何勞玉帛克前除  
所希在良匹非敢愛弱軀良匹苦難偶歲月忽以逾  
空房殊寂寥猶勝棄路衢寄謝諸少年金石難可渝

白馬篇

白馬紫絲韁鏤鞍白玉裝何處遊俠見聲名播戎行  
平生萬里志取復負蓬桑長驅出右地蹀躞古戰場  
腰盤昆吾刀縱橫掣電光臂掛駢角弓羽箭凌秋霜  
深山刺彪虎平原射白狼巧捷無衆工叱咤人莫當  
邊聲昨夜急虜騎窺朔方叱馬奮登陲軍中氣俱揚  
左鼓賢王縛右發月支降往來鋒鏑間坦若馳康莊  
所事在國讎那能念故鄉總無定遠封朽骨亦稱強

蘇小小歌

我裁錦繡段郎灑薔薇水一顧兩相當持為合歡被

雜擬六首

權歌行

浦女逐風流菱歌唱不休紫裙綉綺袂桂擢木蘭舟  
蓮開爭比豔荇亂欲牽愁刺浪珠紛濺迴波練未收  
香隨風宛轉曲與景綢繆變聲諧趙瑟流響失齊謳  
隔花弄明月疑伴湘靈遊

銅雀臺

銅雀何時旦金蠶不復春可憐歌舞地愁殺望陵人  
總帳青楓冷玄臺白莽新惟餘濁漳水嗚咽遶城闈

銅雀伎

徙倚臨飛閣西陵望獨哀豈無瑤席待不覩翠華來

露槿愁歌扇風花落鏡臺舊恩殊不薄心死欲成灰

關山月

朝趨玉關道夜度金微河千山上明月萬里涵清波  
故國紅顏謝沙場白骨多寒衣寄未及顧影獨悲歌

昭君辭

雪擁關雲暗春深塞草黃可憐胡地鴈日日向南翔

當壚曲

病免依邛令無家返蜀都文心工滌器國色委當壚  
拭鏡頭終白挑琴鳳已孤至今酤酒客猶喚卓家奴

雜歌謠十四首

戚將軍歌為閩中父老作

將軍名繼光東平人

戚將軍兵如雲忽聚莫言合忽散草言分隨風蕩瀟

都成文

又

戚將軍兵如神一戰海夷絕再戰海水平肯中萬鬼

冤重伸

又

戚將軍兵如洗截海驚海神薙山泣山鬼一年八郡

平如底

西晃謠為塗人思石將軍作

西晃州驛東西百餘里故路遵溪岸沮澤間行  
平吹久之潦决岸斷行者每陷于險嘉靖中將軍  
石邦憲始聚工鑿山別通一道塗人至今便  
之

晃溪灣曲如環石子磊磊水流潺潺行人失路仰天  
長歎山路開行人來將軍一去不復回

止戈謠為黔陽諸夷民戴吳總戎作吳河内人

各國

東槃瓠西牂牁吹蘆笙栽晚禾娶髦女青馬馱織花  
錦衣越羅郎願困不虛婦願桑葉多推牛榨秫酒為

我將軍歌將軍來但止戈

四言古九首 偶書八首

意不竝銳事不兼隆左方右園僑難為工

其二

毫末不翦將尋斧柯為虺弗摧為蛇若何

其三

已犧何害人犧則難量人量已與世偕安

其四

綈袍贈范純扇遺朱施予則一情偽縣殊

其五

婦人拾蠶漁者握鯁豈誠貴育見利則前

其六

內羞五鼎外膳一肴惡客可愚故人見嘲

其七

奔女之側勿談守貞墨吏之前毋譽卻金

其八

梅徙則杏橘徙則枳地氣何常士慎所止

謁文昌祠

祠在武當山  
二天門內

仙源窈冥陟嶺踰岡一壁斗卓眾峯俱翔玄關洞闕  
彩虹為梁仰瞻清都混混茫茫天墉紹繚五色煌煌

息駕中宮瞻禮文昌太微伊邇帝座之旁羣靈竝轂  
撰轡遊揚我欲從之過謁西皇濯髮湯谷晞身九陽

五言古體六十一首

述志四首

皇矣太初闢清濁開鴻蒙人生貴且靈受此天地中  
四序若鱗次陳迹藐易窮豈伊一抔土掩此七尺躬  
沒世名不稱宣尼志所惆寸陰逝足惜禹德彌以崇  
抗志慕先民蹇予直不聰大猷廣且穆惟彼能者從  
努力戒前路艱哉一簣功庶幾耿耿微可以今厥終

其二

冉冉嶧陽桐猗猗嶰陰竹含茲龍鳳音雌雄遞相屬  
龍爲羌水吟鳳爲軒后曲橐籥宣元氣宮商無陵黷  
茲風已千古遺響伊誰續夢遊上帝居鈞天何穆穆

其三

黃鵠臨當飛徘徊視其翮一舉橫四海須臾萬里隔  
烏鳶集林莽俯啄仰相嚇營營濁世儒所志在干澤  
處膏但自潤何辭服轅軹美哉寥廓士遠遊無遺迹  
一羽輕侯封九鼎重人國遇合鮮常期飄飄從所適

其四

赤日照萬古不槁扶桑枝人世何國奔光景迅如馳

朝菌夕不華霜露難爲姿薰膏苦自焚智巧無以爲  
精衛銜木石東海平無期章亥雖疾步安見周四垂  
何如息萬慮飡霞茹三芝庶幾葆天真善卷良吾師

雜詩十二首

蜿蜿明月珠熒熒吐輝光持以贈所親道路阻且長  
中墮濁水泥千里徒相望志士抗高節憎茲口如簧  
赫赫尹吉甫伯奇行履霜參乎豈嗜殺慈母走踰墻  
況彼行路人何以要不忘睚眦有其端安保不相戕  
棄置非所論無郵示周行

其二



重城繚阿閣鬱鬱造天表迴飈激杳魚飛棟陵縹緲  
惜哉鳳不至而以巢凡鳥凡鳥羣畢逋德輝何杳杳  
棄彼琅玕實啜喋苻與蓼翔止無寧序呼噪失昏曉  
文羽一來儀四顧儔侶少哀鳴棄之去高舉六合小

其三

士自有貴賤道與俱汚隆良賈不居市美女憂入宮  
從事苟失時聖哲難爲工虞卿始遊趙非有根柢容  
一見賜金璧再見舉國從取相如探囊坐致郤秦功  
及其間行去居梁一何窮著書幸自見祇爲遊談宗  
何不執高義希彼魯連風解紛息大難蹈海不受封

其四

羊腸一何坦周道摧車輪溟渤葦可航溪潦浩無津  
膠漆苦不投竽瑟時見親投珠蒙世疑買櫝以爲珍  
冥理本不測變態渺無因於物各有適愛惡從其心  
險夷義所安尺蠖有屈伸惟彼明哲士迢然保其身

其五

人固不易知知人亦不易夢卜得二賢興王有餘智  
方其未夢時凡民何以異良賈貴深藏良工不自示  
遵養待遇合不合渺如棄上客禮負芻下堂握收器  
知己在一言遂爲千古事

其六

海風吹枯桑朔氣盛原野客子寒無衣行役去中夏  
塞外霜草白中夜鳴胡馬浮雲西北馳河漢東南瀉  
豈不懷故鄉瞻望涕盈把橫行氣已摧況乃匹儔寡  
白骨何纍纍撐拄長城下

其七

大造冥無端陰陽互推移人生逝如斯白駒喻何遲  
彭聃豈必壽殤子與同期誰云蒲與柳異彼金石姿  
梁肉饜無味食藿甘如飴纓綉苦結束短褐何委蛇  
達觀萬物理委形皆若遺哲哉河上翁知雄守其雌

其八

田文與趙勝養士亦已多處囊有遺穎徙舍徒勞歌  
三年不見知如此皮相何一日奮排難秦楚爲么麼  
反掌復齊相按劍定從和始知負奇士俛首甘蹉跎  
乘時建大策寸舌雄千戈安用錄錄輩與世相依阿

其九

佳人處重幄歛態何盈盈妓服紕與綺盼笑清芬生  
明月辨爲環雜佩瓊瑤瑛微風動輕裾緩步宮商鳴  
一顧迷下蔡再顧傾陽城念欲結婉孌何以抒衷情  
挹彼沆瀣漿和茲九霞精延佇欲致之咫尺天河橫

將無高丘夢令人徒屏營

其十

矯矯赤水龍視能燭九陰微氛翳白日不照烈士心  
離離洛少年悼彼三閭沈興文弔汨水感遇亦何深  
已矣千百載其辭傳至今巫咸邇可招胡為久不歆  
烈心豈自疑懷往故難任何以寫衷曲閉戶弦鳴琴

其十一

誰謂德無鄰媿阿淆其真誰謂人無倫反側難為親  
恩愛苟不衷金石將且磷四海皆兄弟同室越與秦  
人安勿言故立談勿言新肝膽照日月屬睫生荆蓁

君子貴中立小人趨同塵況乃在末路變態那可陳

其十二

曦日照四術人語何嘈嘈爭塗赴闕闐靡麗成周遭  
牽袂迴飈舉擊軫奔如濤招搖各有營日夕不言勞  
翩翩御輕肥各言絕世豪東隣奮絲竹西肆陳珍牢  
飲至懽亦極萬事皆鴻毛熒熒北郭子徒手被緼袍  
延佇大道傍頗為達者嘲從事貴識時胡為久蓬蒿

賜宴思親

待詔金馬門遂叨大官宴九陌馳青驄宮衣一何絢  
鱗次瞻上公鴈行侶羣彥襜襜王者賓聚此延英殿

陳禮張六樂卿雲爛畿甸瓊卮瀉天漿綠幘進珍膳  
詎謂蓬蒿生能承 聖明眷致身非不蚤顯親人所  
羨傷哉我二親今茲豈及見昊天難可呼風未有餘  
怨趨庭感貽穀入室思聖善三釜不逮存列鼎安用  
薦所以曾參悲北嚮非爲賤亦知幸遭逢食者不下  
嚙

過嚴子陵釣臺

鼓棹日垂暝泝流涉驚湍富春何崔嵬石瀨清且寒  
蒼蒼兩釣石千古江之干攬衣起攀躋山澤多幽蘭  
昔人秉微尚披裘隱其端明月投爲餌彩虹持爲竿

避彼龍虎爭飽此魚鰕餐帝詔豈不殷委質良獨難  
願與巢許遊不著漢吏冠九鼎焉足舉雲臺非所安  
我亦倦遊子濯纓此盤桓偃仰思遐軌劃焉天地寬

哀江南

昔予登蘇臺一覽吳越平浮雲蕩澤國迴飈起滄瀛  
五湖揚素波天目遙崢嶸流睇入雲間碣石參差橫  
日夕館娃宮絲竹發清聲土風事遊冶民力苦暴征  
耕者不宿飽綺絲空奇羸况迺承平久閭閻諱談兵  
豈乏湛盧劍塵埋不得鳴亦有明月刀嚮市衆所輕  
奄忽攬槍降羣妖恣橫行長風吹萬艘濤起天雷轟

吳都良家子倉皇望前旌一戰陷我陣再戰奪我營  
鬼哭長洲苑血腥樵李城白骨蔽上海海日慘不明  
廣衢遊麋鹿王路多榛荆萬類委魚肉安用佳麗名  
昔遊曾幾時遂令田海更殺氣結不散感之百哀生  
安得萬猛士飛戈滅妖鯨

張子培至自吳

客從吳門來未解風塵色且勿敘舊懽把手陳憂惻  
執法降爲殃江鄉遍蝨賊飛刀瑩如霜剝剝鮮餘力  
三吳故佳豔倏忽成異域今朝戰城南明朝戰城北  
漂血膠舳艫輿戶丘山積骨肉不相保田廬詎復識

四顧無人煙舉足羅荆棘此身亦已贅何當有羽翼  
鼓噪銷雄心仰天長大息負母復攜幼潛行蹊路側  
萬死脫虎口追徃意猶惑氣結不成辭悵悵滄沾臆  
聞之傷肺肝流光黯昏黑

登廬山絕頂

廬阜浩緜邈含靈翊洪都下蟠厚坤軸上燭南斗樞  
渾沌竅初鑿夸父骨已枯諸峯秀雲表列郡巢其郭  
我策廬敖杖舄以王喬鳧逍遙陵絕頂飛觀亦何孤  
三梁跨欲絕五老森相呼松孕萬年苓鶴將千歲雛  
半嶺雨暘隔一朝寒燠殊重巖表僊隱古寺羅名區

蒼蝕巨靈掌星錯摩尼珠靈光展石鏡霞氣薰香鑪  
瀑布落天漢濺沫成江湖濯髮天池端冥然鑑虛無  
五嶽總拳石古今亦須臾且與方外友狂歌醉瓊蘇  
晤言諧夙歡有酒清且旨佳會難可常羲輪逝如駛  
忼慨發清商知音悵何已但比同心花安能久連理

郊行

出郭望四郊蒞止廬山麓老稚走相從欣此柴桑俗  
世遠松菊蕪年登庾廩足狐穴匡君祠犬吠康王谷  
天際羅羣峯懸泉墮鳴玉抱杖出脩林聊以縱遐矚  
日夕驅馬歸懷古念彌篤鼠腹本易克鳧頸詎宜續

人生各有涯胡爲久錄錄安得如陶公終焉托醺醪

遊仙篇贈劉叟

僊人從何來云自終南山天風矯雲翼須臾八極還  
頓轡南斗傍晞髮天池端手扶綠玉杖叩我巖下關  
問年不知紀餐芝美紅顏授我無上秘飲我長生丹  
我欲從之遊白日生羽翰扶桑一何遙萬崙不足攀  
逍遙及太清四顧非人間

秋夜獨酌

端居息萬慮候蟲鳴我牀起步臨前除明月照我裳  
仰視河漢影綿綿秋夜長躑躅不能寐縑綵稱壺觴

埋照非有穴適意卽此鄉調笑五老人彭蠡爲吾漿  
獨醒還獨醉於世竟焉妨高樞脫旣盡桂樹乃芬芳  
物理固如此吾飲殊未央

梁園吟

菟園三百里平臺古商丘星分燧人紀風啓倉頡陬  
上公此食采東夏遙尊周賓客信陵散乘輿孝王遊  
授簡賦雪月築宮延枚鄒逶迤複道引暎帶黃河流  
危嶺抗龍岫曲池藏鶴洲脩竹蔭千晦彩雲揚九旂  
豪華未終竟極宴生繁憂旋看狐猿穴半是歌舞樓  
客子悵懷古經行重悲秋况復司馬倦頗同虞卿愁

桐門日黯黯棘澤天悠悠今昔不相待富貴誰能留  
紅顏總自誤明月莫輕投五斗盡沽酒萬事都沈浮

舟中望嶧山

浩浩黃河流蕭蕭大隄樹翩翩操舟人闐闐奏桴鼓  
中有南冠子含意不得吐望魯隔龜山陟秦阻梁甫  
茲晨發邾婁進帆魚臺浦瞻彼嶧陽山鬱鬱峙千古  
秦碑蝕旣盡孤桐亦已腐在物無醜好過時俱塵土  
人智闇雌雄於終竟焉覩我欲從茲山其如乏脩羽  
日暮舍之去徬徨涕如雨

悼亡詩

人命但朝夕冥運何倉皇憂多樂苦少生短逝日長  
零露本易晞行雲去如翔雖有蘭蕙姿倏忽萎秋霜  
念子秉昭質素里揚清芳婉孌自疇昔明誓結不忘  
動若形影隨居若琴瑟張況與歷貧賤卒歲持糟糠  
頗希舉案風亦切趨機防相予匪一德乃幸嬰圭璋  
宛其中道徂胡以不永傷明月照故幃悲風襲我牀  
良無續命丹安見反魂香音儀從此隔泉扃杳茫茫  
凌晨思髣髴中夜起徬徨同心而異世中閨鬪無光  
已矣德宮儷聊申祥服章異哉蒙莊子鼓盆毋矜狂

五言古

八子詩

八子皆弘正間名家予讀其詩有采焉因各  
贊一詩志神交云

李學憲獻吉

獻吉起北地操觚幹元機上探軒虞矩下抉楊馬微  
中流障頽波濛汜揚初輝雄哉草昧圖羣哲相因依  
遂令大雅還始識新聲非况乃矢忠鯁九死干天威  
宏辭潤高節赤日爭餘輝淪沒良不朽靈均與同歸

何學憲仲默

倬彼汝南士冥悟窺鴻蒙童齡振奇藻弱冠稱宗工



抽翰校秘書  
黎光燭西宮  
弦歌奮求友  
逸響騰高空  
燦比若木華  
諧如羌水龍  
同聲自相眷  
恥為達者容  
適意在萬古  
豈必躋三公  
至今攬遺牘  
穆然生清風

徐博士昌穀

吳都擅妖麗  
作者紛自寶  
昌穀起中微  
澹然志幽計  
濯髮臨清淵  
驅車遵周道  
宛彼舜華姿  
被服紈與縞  
輪斤有疾徐  
應手不言巧  
得意塵壒間  
超忽踰靈島  
譚稭有獨致  
頽風一以掃  
年短流譽長  
胡為悲不造

邊尚書廷實

廷實本國器  
矯翼自太常  
博綜號武庫  
高視臨文昌

豈握東岱英  
五彩流篇章  
一語觸神解  
陶謝良相當  
脩轡騁天路  
方舟濟河湟  
乘時翊昌運  
休問彌以揚  
斯今齊魯間  
聞風襲餘芳  
生榮死不朽  
何忝名山藏

鄭司封繼之

谷口遺高蹤  
鄭生豈其裔  
澹然隱金門  
玄理屬冥契  
倡和諧同聲  
登臨縱遐睇  
願言崇好脩  
寧獨侈宏麗  
古道良所敦  
真境日以詣  
偶爾披遺編  
蘭薰襲衣袂

王檢討敬夫

王生斥弛士  
多技亦多艱  
少遊翰墨林  
藻繪何班班  
九阪知逸足  
六宮競朱顏  
涉世鮮明哲  
流言遂漂山

恩深罪殊薄一竄不復還  
鄩杜足偃仰行歌弄潺湲  
王吉士稚欽

維楚故有才誰爲稚欽  
偶早歲發天秀匠心應其子  
高視千載前左馬相先後  
寧操湘女瑟恥擊秦人缶  
調世如弄丸罵坐非使酒  
敖然詠新篇豈復聞師友  
遂爲禮法攻一官棄如垢  
傷彼荆山璞終焉不見剖

高按察叔嗣

叔嗣秉玄覽弱冠侍清穆  
朝回坐華省抽翰從所欲  
時援綠綺琴起奏清商曲  
三歎有餘思松風何謾謾  
引領懷良朋申章屬珠玉  
古道自攬持巖然負流俗

雖駮何李後匪乏千里足  
惜哉天天年長駕阻中陸

四子詩 王元美

王郎故家裔曄曄瓊樹姿  
英風振江表文彩稱神奇  
少年策華津四顧多所疑  
志在千古業寧希一世知  
折節交李郎大雅當在茲  
華陽結高會五子僭應期  
齊聲奮清響浮雲東西馳  
時情詎終測友道無磷緇  
中意各未伸羽翼行差池  
榮名不常保念當久睽離

宗子相

淮海挺斯彥鬱鬱麟鳳標  
致身青雲端嘉譽盈中朝  
游揚豈不廣冠蓋紛相驕  
微衷各有屬鳴鴻夜嘹嘹

一顧得儔侶勿云天路遙攜手結古歡吐氣千層霄  
易彼淫哇耳冷然被箭韶力欲追作者安知骨已銷  
去國勿復道何哉鵬爲妖念此平生親魂遠不可招

徐子與

美人起天目吳會欽令名抽翰挾華藻高步揚前旌  
憶予釋初服與子馳帝京衆中一以盼躑躅私相驚  
神物當遇合枯根以時榮恍慨托風雅遂爲金石盟  
酒酣發高倡流響恣縱橫但希知音賞敢厭時俗輕  
精光忽以蔽誰能寶連城努力戒遐軌廣路偕于征

梁公實

南海浩無際珠樹榮其中之子秉異靈軀孱氣何雄  
結髮嗜往古操翰追其風文心躡東漢詩軼顏謝工  
一出邁良友糟粕忽以融反顧結遐轍思欲躋崆峒  
浮雲去萬里獨往偕冥鴻神山在咫尺安期尚可逢  
大藥豈誤人厭世殊匆匆誦子虹澗篇萬形委虛空

登武夷山二首

名山奠南隩甲觀浮雲齊上闕羣仙府下纏九曲谿  
琪樹榮青林文鳥翔丹梯出沒霏霧間永日恣攀躋  
金光吐靈穴真氣耿不迷何當遇錢鏗挾我霞外棲  
楚楚黃冠子抵掌談刀圭豈其大丹訣乃托空筌蹠

其二

緣澗躋飛梁馮虛步崇殿雲林鬱以紆天柱從中奠  
煙濃玉女鬟苔繡鐵佛面歷歷排羣峯朱華競蔥蒨  
豈假巨靈擘非經媧后鍊巖泉漱石脂洞草積瑤獻  
界朗神與清塗迂景忽變手調赤雉羹將為列僊霰

天柱即大王峯  
鐵佛即幔亭峯

泛九曲谿二首

林端日已歛心賞未云足言攜武夷君泛此雲溪曲  
流藻牽微瀾鳴榔應虛谷坐愜巒氣澄行驚練光束  
波猱掛巖柯虹蜺飲沙麓夾水羅羣峯參差三十六

絕壁鮮棲禽云有仙人屋僊去無還期微茫瞻遺躅

其二

曲水縈山心入山轉冥冥翼舟雲欲飛依渚石爭削  
夕照陰綠蕪迴煙霽丹壑羽衣奏笙璫中流下玄鶴  
倏忽踰初境遠峯澹迴薄似得武陵津不淺濠梁樂  
詎知宦遊蹤飄然寄寥廓

懷元美二首

越鳥不繫書吳雲阻重嶺相望一何勞淫淫涕如綆  
秋風生我庭梧葉下空井中夜起踟躕但視明河影

其二

十年謝纓綬一詔起巖穴薦書良獨完謗書復何缺  
牛鼎無常烹羊腸鮮寧轍歸來伏龍山於世夙超絕

秋夜同周子徵珠江泛月

良夕豈易逢奇遊夙所慕暝陰薄層城浮雲澹相赴  
須臾明月生澄空皎如素縱艇隨輕潮披衣下織露  
髣髴海市通相將天河度中有弄珠人亭亭出煙霧  
微颺振鳴環綽約清虛步手裂雙扶桑化作千琪樹  
幻景良若斯翛然啓冥悟

夏夜偶涼卽事效梁人體

炎方雨忽霽夕閣涼如秋星雜簷螢落河連枝鵲流

榕陰滴衣桁荔色炯簾鉤月擁玉壺上天銜珠浦浮  
輕颺動白苧密篠鳴蒼鳩拭簟冰初合提紈雪未收  
不寐憐光景長吟步斗牛山煙微入幔海氣積爲樓  
病當三伏起老作九真遊江漢渺何許關山悵悠悠

輓梁思伯

別君十年餘思君萬里道只怪緘書遲那知厭世蚤  
忽沈南海珠罷起明光草石墨與丹鉛遺爲藝林寶  
綈帙虬龍蟠素練煙霏掃一抹輞川明片楮蘭亭巧  
此物神所忌斯人豈難老波昏鮫女宮霧吸龍駒島  
遊魂去何之泉路漫浩浩朝露本易晞晨星不及杲

詹甫江漢  
中土欽名德燁燁鳳與麟皇天忍降割胡然奪其親  
哀哀向河濟奄忽俱沈淪而我踐斯境寓目皆含辛  
已矣竝驅意握蘭渺無因夷門慘不華平臺蔽黃塵  
大雅日以遠流俗日以新知音阻泉路念之涕盈巾  
謁于少保廟

少保社稷臣丹心燭千古立朝策元勲定難表神武  
一言凜萬鈞萬死輕一羽寧犯天鉞誅毋寧負  
皇祖置國等泰山四方用安堵壯哉方叔猷豈其與  
公伍昔公馭絳騶布德綏中土至今河嶽間痛哭思  
恃怙峩峩報功祠乃在汴之濟遺像儼如生文章錯

珪組賤子登斯堂百年宛親覩循循一儒流忠貞播  
寰宇顧瞻有餘慙談往舌欲吐采薇首陽山采蘭沅  
湘浦薦之諒所歆聊以克簋簠

贈張子元

崑崙奠西極培塿造其端宣氣產神物羅列仙人壇  
瓊琅長爲林弱水流爲丹地乳溢中土鬱鬱靈鼇蟠  
五嶽五卷石九野九彈丸冥境浩無際所貴在達觀  
愚公慮苦遠智叟從所安臥遊有至理意適神斯完

梧塘山居喜羽王京兆過訪

女夷暢天和玄鳥在高木藜簞夾脩渠垂蘿翳巖屋

微風自東來爽氣襲初服灌園不知疲臨流飲黃犢  
興至發浩歌餘響赴空谷眷我青雲交迴車訪幽獨  
歡言漉新醅佐以山中菽圖書恣神賞郊原縱遊目  
石淙鳴樹間頗勝綵與竹俛仰從所欣居然遠流俗

酬孫光孺

雲夢楚奇觀九水自今古西瀨嶓岷根東膏吳越土  
煙光浩無涯日月相吞吐我昔乘輕舟陵虛縱遐覩  
將挾蛟龍遊遽犯風濤怒邁子在中流宛爾滄浪父  
眷我亦何親玩世亦何武千載微屈平誰其詞賦祖  
况邁知音希俛仰滋局蹐豈歎出無與良嗟璞爲石

悅焉思古人珍才重賓客白壁交虞卿雕龍侈鄒奭  
今茲行路心縱橫忽如奕歸與江漢濱且仗看雲策

園居

岐路迷所適言反幽貞廬悠然謝塵埽地遠志亦舒  
腰鎌刈蕪草灌畦得嘉蔬持之市美酒與客臨清渠  
班坐無倫次杯行從疾徐酣至發高倡微風蕩襟裾  
聊以解形役安知與世疎

贈金將軍

將軍故儒流意氣亦何激所志在四方乃學萬人敵  
力能挾九鼎巧欲嚙飛鏑上馬橫琯戈下馬工草檄

角射長楊苑一發破懸的矧茲用武時邊烽未全熄  
但微推轂恩捐軀赴戎狄豈必孫吳徒獨樹疆場勳  
矯哉班定遠榮名起投筆

偶書三首

其一

乳虎紛揚威屠伯亦何廣三章約已虛五毒更相枉  
一入無赦條誰從辨鉤黨衛索不逮籩梁書不遑上  
駢首就誣服冤氣鬱霄壤怪哉咸陽市白日號魍魎

其二

上逢太平時德意何局促三宥恩未彰罪累屍已伏

豈無東海冤亦有渾良哭一史按刑章千人登鬼錄  
誰云酷吏風作備自幃幄殺氣干天和安望于公福

其三

大臣自休休朝士自諤諤庶幾盛世風共副心膂託  
古道一以微周公豈復作愚夫諱言病死不受良藥  
一語犯其陰恣睢忍相虐正氣幽圜扉英才置靡莫  
防口何大勞調元日以薄烏鳶嚇未休腐鼠畏人攫

遊燕子磯同行甫仲美賦

江行睠名山茲山何翠律繫舟兩崖間數峯倚天出  
矯易恣攀躋巒光秀堪結縣榜躡虛無迴波潏蕩瀟



飛閣鰲陸危風帆鳥爭疾奇哉燕子磯坐瞰鮫人室  
古臺樹盡樛陰谷蘭始茁引望窮東南徘徊忽自失  
拂石喧傳觴探竒競操筆酣歌激清籟萬境俱瑟瑟

七言古四十五首

越女行贈友人新婚

越女窈窕臨新妝鏡臺雲生五色光珠華旖旎蘭澤  
芳霞綃霧縠明月璫一水盈盈隔瀟湘郎君欲濟河  
無梁青鳥銜書烏鵲翔天邊機杼遙相將履綦不動  
輕塵揚鳴環歷歷諧宮商錦屏綺席羅中堂南薰徐  
吹琴瑟張飛絃促柱何洋洋齊聲雙勸瓊露漿舍情

攜手赴曲房繁星在天夜未央同心燭照珊瑚牀合  
歡被繡雙鴛鴦懷中取贈西國香何以貯之金錯囊  
良時極樂兩莫忘但與天地同久長

景州塔

景州塔高崔嵬金輪寶樹層雲堆海上六鰲戴未穩  
何方孤鷺飛能來參天忽如一柱觀射日不見黃金  
臺舍利光浮大空紫梵鈴聲起溟渤哀此中徃徃千  
佛現燕趙兒女紛相猜景州塔高崔嵬我欲登之望  
五嶽五嶽隱隱蒼煙迴手捫星斗策風雷掀髯大叫  
天閣開俯身叱馭雙鶴回一顧萬境俱塵埃長風吹

塔塔欲摧須臾化作龍池灰白蓮社客真凡胎西方  
之骨何爲哉

鄧母張太孺人七十壽

朝上七臺顛飛睇入牛斗英英五色雲中天陸離走  
彷彿麻姑仙瑤池謁王母青霞結爲佩沆瀣挹爲酒  
王母不可招麻姑望何遙盱江城南萬峯立金盆玉  
笥芙蓉嬌西來鶴馭下赤霄武夷雉羹秦臺簫鄧家  
阿母垂黃髮手扶綠玉干星杓壽觴之前彩衣舞儼  
爾羣仙絳節朝河清可俟嶽可移人間福澤天無私  
兒郎矯矯冰玉姿石匣丹書夜夜披南州桂氣鬱不

散青鳥相將銜紫泥昭陽太守故無奇兒郎談經解  
其願言從假館留賢日遂結升堂拜母期

齋中木槿盛開感而有賦

去年插槿不盈尺今歲作花覆墻出叢條密葉含蒼  
煙澹白輕黃耀初日一樹深紅隔絳紗驚人彷彿開  
山茶木蘭石竹抱幽意避爾不敢揚芳葩誰道花奴  
強自持朝榮夕落莊生悲且將杯酒弔蘭竹世上繁  
華曾幾時

穎川值雪有作

蒼雲奄忽低穹昊羣雀喧棲何太早朔氣凝寒猛刺

骨集霰飛靈漫浩浩颯沓旋隨風伯騎鮮勺盡奪天  
 孫巧珠花著樹成海宮石乳浮山作蓬島二儀欲合  
 七聖迷何人復識許昌道許昌城裏駐征輪十月舞  
 絮爭陽春百堞光搖素鶴羽千蕩影轉玉龍鱗齊紈  
 魯縞失顏色帝臺天室增嶙峋授簡誰招梁苑客倚  
 空虛賦洛川神紫貂未敝且市酒從他兩鬢都如銀  
 次廩延得房方伯書謂新釀且熟待予發興輒

賦短歌報之

梁園三月空鶯花一水相望天之涯為報不頭釀新  
 熟恨不飛渡眠君家榨聲瑟縮疑在耳黍氣風飈觸

吾齒興發掀髯挈酒經偈芻流涎殊不止膾魚絲筍  
 佐飛觴便好三萬六千場舉世皆醒吾欲醉眼中誰  
 似楚人狂

羽王為我題蒲萄卷走筆謝之

蒲萄索索尺練寒澹煙濃露生毫端墨香疑滴馬乳  
 汁珠顆欲墮千塗盤漢玉晶盤千塗國所貢張郎嗜佛亦嗜酒

開卷詩成何應手但與溫師飽清供不須持換涼州  
 守

謝羽王送猫

怪哉黠鼠巢吾廬啣吾衣履殘吾書幸君乞與狸奴

子鏡目斑文虎不如竦身一發捷飛電須臾喋血陳  
屍見安得壯夫如此狸鼠視羣醜無虛戰

江上有聞與行甫醉歌

君不見霍光秉政二十年子弟親朋羅御前一日鴟  
鳴鼠晝地千家銷歇無人煙又不見竇憲勒石登燕  
然入朝封拜何翩翩朝賜食邑暮賜死腹心牙爪墜  
深淵古來寵利難久恃況乃專恣竊帝權菽麥未分  
駢鼎甲吮癰舐痔稱豪賢跳笑羣兒自相貴蠅營蟻  
附克都屢直臣竄死詞臣放自謂機衡可世傳豈知  
四海已重足戾氣鬱鬱于皇天瞬息風雷不可測坐

見川陵有變遷遠同霍竇無旋踵近視分宜亦比肩  
失勢紛紛抱頭泣冰山日出平爲田塞馬得失故相  
倚楚弓存亡誰見憐電光石火須臾盡九錫何如一  
醉眠

侯憲使邀同仲美遊峴山因過習家池酒間漫

賦

襄陽重鎮馮三峴峴首昂藏臨漢沔古水東流直至  
今空山卻藉伊誰顯不見當年墮淚碑惟餘一勺高  
陽池池泉欲涸釣臺圯蕭蕭草樹都含悲使君好客  
復好古每當勝處移樽俎野興何如習侍中高風不

減羊開府萬里江風吹月來山南山北浮雲開世上  
浮雲總千態不敵登高一舉杯

觀黃鵠畫馬歌

曹韓畫馬冠唐史近代稍稱趙承旨六法于今久寂  
寥狸骨螭頭浪相詆中都偃蹇來黃生客楚三年未  
著名晏坐舍毫悟神理恥操片紙干公卿渡江千里  
叩巖扉一語當樽興欲飛吳州生綃瑩如雪象形磊  
落心精微濡墨已疑天雨粟澹掃權奇馬如鹿骨相  
全師八駿圖天機欲奪九方日行空伏櫪本殊態歎  
玉流珠那可再高價虛傳郭隗臺橫行好絕單于塞

閭闔風生匹練搖渥洼電繞龍駒驕山堂入夜雷雨  
作卻愁神物俱騰驍吁嗟黃生妙心手孫陽一顧偏  
難偶騶裊長鳴九坂途廣衢爭策凡駘走

富口發舟東行四十里遇大風折舵幾覆復平

與仲美醉歌

可笑甌甑洞中叟老來性癖耽遨遊西去纔停漢水  
棹東行更泛吳門舟吳門故人二千里恨不風帆疾  
如駛兩岸青山盡逆飛中流獵獵狂飈起狂飈鼓浪  
浪蹴天帆摧舵折舟盤旋僕夫叫號長年哭只尺便  
抵蛟龍淵蛟龍厲齒猛相向擬殉靈均魚腹葬照水

文犀那及燃沈江鐵鎖難爲抗沈江照水力已微誰  
能坐制天吳威管寧思過只晏起何勞斬怪招要離  
要離已化吳中土躑躅負舟見神武老夫長嘯方郎  
歌生死須臾亦千古嘯歌初歇風漸柔江神爲我驅  
陽侯泊舟且市漁家酒醉看月上廬山頭

吳中醉歌與羅伯符

山中別我亦何久江上逢君良不偶相看已改別時  
容何當莫放逢時手娶散浮生信轉蓬風流所至難  
爲耦書法年來漸有神下筆不遜顏與柳有時醉墨  
灑煙雲捷若良工揮望帝黃金遍結高陽徒白首不

納臨邛婦詞名藉藉公侯間長揖自稱布衣走橐裝  
已盡四壁存猶解家珍爲我壽閭闔城頭千樹花姑  
蘇臺畔百壺酒入市那聞伍子簫當筵但鼓秦人缶  
酩酊將從海嶽移歌呼猛敵蛟龍吼吳中豪傑君所  
知向人休說甌瓠叟

閭門別吳叔嘉短歌

吳中少年多好文澹交雅致無如君綠髮遊蹤半五  
嶽歸來四壁滄江漬憶從下雉一攜手乞我片言常  
在口我今東泛五湖來十日三醉君家酒酒酣欲別  
君奈何閭門獨立成悲歌贈君盧敖之杖王喬舄片

雲吳楚便相過

悼陳光州貞父詩

長安市中得吾友肝膽熒熒片言剖奄忽風波羽翼  
垂一官浪逐羊腸走生平俠氣當奈何自憑短劍鳴  
鳴歌恥用文章博聲利強從案牘忘蹉跎蹉跎已自  
非人意厭世胡然託魑魅隣笛但送山陽悲天樂虛  
迎玉樓記九龍山前三尺土宿草壘壘隔今古酒熟  
蘭陵好共沽哀哉不起陳貞父

蘇軾洞詩集一卷終

蘇軾洞藁詩集目錄

卷之二

五言律詩

塞上曲五首

送張肖甫之滑縣令

夜過梁公實比部言別

問徐子與病

秋夜慰內病二首

冬夜于鱗子與攜酒見訪

飲毘陵白氏山池

泛西湖二首

春日過明府二叔山館

哀商中丞二首

朱仙鎮謁岳武穆廟

劉武庫方回見訪

秋夜

同王戶曹弘度憇天寧寺

詢王元美病

送蘇明府赴東陽

得元乘書

暮秋感懷二首

贈王敬美新婚

夜飲湯給事懋昭宅

病中寄于鱗

伯倫過訪

除夕

寄徐立之給事時宅憂

里中

寄莊則勸

同元美子相席上各賦一物得橘

春日郊外小飲

元美宅對花

乙卯五月五日生子命

名阿端小字無忌喜賦二詩

張氏園亭同德甫子相元美宴集四首

送孫子升下第南還 重過張氏園

有感示子相元美 聞同年王錢二令尹相

繼死賊中作此哀之

夜過子相酌中大雨 冬日即事有感

訪元美寺中因留宿 被謫

東黃亨夫給事 風雨

初發潞河 泊獨流河



董生祠

臨清胡倉曹招飲分署

池亭

同子與散步河上

席上贈朱邦憲還松江

濰河候舟

將別子與作

樹德宗侯所對菊

抵家

夜集

用晦池亭夜遊

柴桑

送朱文學赴剡令

宿依仁寺

登天池

立秋夜對月

宿赤烏觀

答用晦

秋日匡山二首

方回山莊

卜居三首

喜雨東林使君

周太守虞叅軍載酒餞

予郊外賦此為別

渡濠梁

酬吳峻伯督學

夜同張肖甫吳化卿集

黎惟敬所得棲字

過子路墓

至歸德

天寶觀題

冬日用汲園見梅

晚次柘城

再詠盆荷

朱氏山亭

春日赴閩舟行即事

王使君子薦招飲范氏

池亭二首

訊丘鳴周光祿

寄題陸廷尉道函吏隱亭

舟中望黃谿山瀑布 黃明府七十

重過南浦用晦攜酒出訪共賦文字

重過劉文輝山第 過孔子河

道逢梧州錢使君叔美竝駕北上次長潭阻雪

命酌旅舍歡然賦此

小除日同惟敬楨伯夜飲約卿侍御所分得多

字 除夕與劉伯良文學坐

談 再經汝南訪張子畏留

酌分得樓字

夏日攜壺登西塔寺同君敬季狂避暑共賦迷

字 發芋原驛

發自劔浦山行入樵川即事

郡齋與莊則勸夜話 送則勸還楚

登丹臺同君敬作 哭二兄二首

除夕郡齋同君敬守歲分得人字

七臺寺五首 九日登高山同顧沈二

山人宴集 除夕

宿順昌 同丁庸卿水口泛舟得

山字 沈山人買妾

夏日同趙汝脩閣上人登凌虛閣

與四兄言別二首 袁明府南園夜集

德甫用晦載酒訪予石亭館因屬以上居之事

至日大冶縣作 陳廷評玉叔康山人裕

卿夜過席上得工字 西平遇程近約使君夜

談 奉送龐中丞巡行五路

屯鹽 留別陳太史子錫陳廷

評玉叔 夏日庭卉初集二首

齒病自嘲 桐江哭羅太史

中宿峽 宿石門山下

望海 病中答曹有卿參政

楊別駕署亭小飲 過李明府西岸竹亭

東齋新成即事 立秋東齋夜坐

七夕東齋與二客對雨

重泛鑑江 哭熊元乘中丞三首

臘月署中見桃花 電白南樓望海

題黃公補漱芳亭 夏虞卿邀過梁氏園留

題 重遊七星巖二首

得歐楨伯文學光州書

珠江舟中與戴使君夜談

與唐寅仲秀才

唐門弔古二首

酬沈嘉則二首

賀許孟中生子二首

除夕戒嚴

元日南城樓閱戰二首

江大叅李兵憲枉餞三橋驛奉謝

酬朱邦憲見懷二首 題石處士一谿草堂

蔡景明僉憲招飲分署池亭同子與賦二首

少司徒姜公岳陽樓餞送

集新橋館

茹工部禮卿園亭對雪

同諸大夫宴汪評事江亭二首

同林仲清憲副飲石蓮峯頭

夏日同諸大夫東亭觀蓮

題呂仙圖贈周使君 偶過茹園再贈六首

重過飛雲洞

王母洞

登絃歌臺

過子由亭

送吳京兆赴金陵二首

題伯榮宗侯竹居 雪夜宴劉右史宅

賦得名駒贈方元素 重過黃園

松月樓

花間偶詠二首

莊則勸過訪二首

郭憲使篤周見訪

則勸以朱魚十數頭畜之孟中見遺賦謝

同張羽王登山見紫芝獨秀喜而采之

舍傍小亭初成即事二首

泛西湖

登鍾成山觀

泊舟梧塘聽泉

林間小飲

詠螢火

聞田歌

西灣晚棹

避暑小室

立秋後三日泛舟

喜雨東楊使君二首

李文仲過訪

秋夕同懋弘戶部登寂

潭寺

秋日湖上雜詠六首

與茂承夜談

喜孫兆孺過訪

呂相國枉過小宴

植玄貞木

初夏文錦閣對雨二首

王行父同廖珍之君直俞本之見過文木園小

飲時兩兒在侍行父有作賦此和之二首

夏日同莊則勸程萬里暮泛北湖

與則勸萬里飲石蘭橋

讀羽王萍浮集因贈之

晚過通真觀訪載道 仲將明府自山莊移居

西郭外不遠見客作此簡之

同徐懋誠飲石蘚亭作

同羽王攜酒邀汪方二山人泛舟二首

通真觀訪惟一因與步過北園

冬日與仲美對菊 宿楓林寺

舟夜聞鴈有懷 楊使君攜酒枉過北園

龍甌洞藁詩集卷之二

武昌吳國倫著

始安張鳴鳳校  
新安方尚贊

五言律詩 十首

塞上曲五首

叱馬過幽州橫行北海頭朔風喧鷺鼓飛電激蛇矛  
奮臂千山震英聲百戰留天威揚萬里不必後封侯

其二

朝辭丹鳳闕暮指玉門關赴國男兒事誇胡談笑間  
一呼遮右地再鼓奪陰山肯使天驕子仍餘片甲還

其三

平生負俠骨所志在疆場不滅匈奴盡誰稱國士強  
九旌懸漢日萬騎蹀胡霜慷慨臨戎去寧辭隴阪長

其四

飲馬長城窟燒生救勒川羌人吹笛過漢士枕戈眠  
戍久安鋒鏑歸遲忘歲年閨中婦品老猶寄擣衣篇

其五

飛將出龍城風高萬馬鳴長驅隴右絕一戰幕南平  
敢愛禽王力非邀拓地名捷書報天子封拜滿神

京

送張肖甫之滑縣令

君行爲茂宰猶復適京華邑枕黃河曲山連魏郡斜  
鳴琴清案牘露冕問桑麻肯使循良傳徒爲漢吏誇

夜過梁公實比部言別

尊酒聊深夜兵戈獨此時艱危同爾病意氣亦吾私  
白髮閑居賦紅塵歸去詞嶺南千萬里何處寄相思

問徐子與病

萬里懷歸客秋深思轉衰孤雲憐伏枕叢菊負登臺  
詩老潘生鬢時危賈誼才中庭坐明月念爾獨徘徊

秋夜慰內病二首

就我長安邸其如病轉侵異鄉兒女淚薄宦歲時心

攬鏡俱愁厲鳴絃亦苦音鹿門好借隱何日遂抽簪

其二

中原多難後南國遠移居業已辭蠶室寧忘挽鹿車  
糟糠殊不薄藥餌竟何如乍喜鄉書至冷然憶故廬  
冬夜于鱗子與攜酒見訪

家貧偏嗜酒好事孰如君竝馬衝寒過論詩坐夜分  
風塵存爾輩天地有斯文不盡飛揚色高歌向白雲

飲毘陵白氏山池

雨後山衣合煙中水謝開落花當野席脩竹引深杯  
客有乘舟興予能着屐來醉看風日好疑自習池回

泛西湖二首

地自東南勝湖兼水石奇迎船峯縹緲遶席樹參差  
得景狂難制臨流醉不辭輕雲涵夕照千頃一玻璃

其二

言攜花外酒更上水心亭月湧龍宮出雲依鷺渚停  
波光浮大白山影落空青隔浦漁歌發銜杯肯厭聽

春日過明府二叔山館

地僻車塵絕雲深草閣開追隨歌楚調偃蹇愧玄才  
萬樹春陰合千峯雨色來酒酣真態出花底坐徘徊

哀商中丞二首



唐書 卷之二  
胡虜縱橫日明公將相才夢猶懸馬革身已謝燕臺  
斗傍朱旗閃風吹素幔回梁書不復上楚世益堪哀

其二

北伐勤王略中興屬將權人皆痛者舊天未厭腥膻  
罪重分憂日恩深望赦年當時諸部曲塞上泣風煙

朱仙鎮謁岳武穆廟

一羽班師詔千鈞殉國身虛廊圖甲馬喬嶽領精神  
無復腥膻入惟應俎豆新興亡都逝水千古滌盈巾

劉武庫方回見訪

偃蹇文園病艱危武庫才壯心俱倚劔時事可銜杯

白雲郢中曲黃金薊北臺百年俱汨沒茲夕且徘徊

秋夜

豈敢厭朝謁相將效陸沈秋風侵病骨暮雨亂愁心  
伏枕梧桐落拋書蟋蟀吟那能畏官長騎馬日追尋

同王戶曹弘度憇天寧寺

下馬聞鐘入逢僧輟杖迎香臺縈竹色仙梵落松聲  
旋結逃禪社都忘住世情未須頻問偈坐久悟無生

詢王元美病

爾自悲搖落應兼感滯留少年湘客賦多難杞人憂  
芳草歸前暮黃花病裏秋題書問王粲何日共登樓

送蘇明府赴東陽

昔我遊於越名山金婺多卽看茂宰至還似隱侯過  
官舍開蘭茝人家足稻禾春行西峴外駐馬聽絃歌  
得元乘書

已道還江縣猶然滯海門別來新鬼哭書至故人存  
萬死懸兵力孤忠藉主恩豈無排難意畏路不堪論

暮秋感懷二首

草詔下西清燕山落照橫雲寒鴈不度月暗鵲初驚  
意氣非輕世文章敢近名可堪搖落後對酒百哀生

其二

天語傳三殿兵威走百靈侍臣頌甘露飛將掃妖星  
此日心誰赤千秋史獨青災祥殊不定吾志在傳經

贈王敬美新婚

不忝乘龍客名家倚馬才片雲飛楚峽雙鳳下秦臺  
月避新粧出風搖雜珮來曲房春大早花燭徹明開  
夜飲湯給事懋昭宅

偶從青瑣下相對綠尊傾河漢流宮樹煙霜滿禁城  
深憂存麋諫起舞待雞鳴羣盜縱橫甚能忘故國情  
病中寄于鱗

憶自孤城別思君夢屢違壯心銷藥裏歸計滯戎衣

閉戶風雲過裁書雨雪飛未應吾道拙其奈世情微  
伯倫過訪

賴汝憐幽獨常能騎馬來歲時堪旅病文字豈吾才  
雪後鶯初度春深花未開即看今日事那可不深杯

除夕

歲盡殊蕭瑟呼醪欲放顰未堪愁入夜已是病經春  
蘭臭當誰共椒盤與俗親燭花開徹曙應笑倦遊人

寄徐立之給事時宅憂里中

雙淚辭青瑣孤雲臥碧山緘書隔歲至戀闕幾時還  
浪迹兵戈裏浮名玉石間故園憂不解寧獨世途艱

寄莊則勸

莊生何自苦寂寞著南華定有知音在無為抱玉嗟  
大江流日月孤館闢雲霞却憶乘舟興常能醉汝家

同元美子相席上各賦一物得橘

嘉實垂南國何從薦玉盤已堪蘭臭竝不數蔗漿寒  
消渴心初慰風霜色更丹何人憐楚頌常憶故園看

春日郊外小飲

出郭知春事芳菲野望通聞鶯過杜曲下馬醉新豐  
花氣流新雨杯光盪遠空習池歸未得乘興亦山公

元美宅對花

當階種紅藥春盡發華姿物理看如此為歡勿過時  
度香風滴滴分影日垂垂豈識遊園興翻成攬鏡悲

乙卯五月五日生子命名阿端小字無忌喜賦

其二詩

行年三十二抱子未全遲豈有吞蒲瑞偏逢插艾期

貧家旋脫紫弱臂強勝絲風俗憎齊戶而翁總不疑

五日子謂長與戶齊不利父母蓋忌之也語在子孟嘗君傳子故反之曰無忌云

其二

吾已慚燕駿爾寧千里駒狂呼洗兒酒親繫辟兵符  
英骨殊難定愁心乍欲無故園兄弟隔誰為報將雛

張氏園亭同德甫子相元美宴集四首

文章非客計衣馬役吾形忽對名園色能令病目醒  
天垂片石紫池闊萬松青莫作他鄉歎乾坤總泛萍

其二

夕露垂巖樹晴虹跨石梁山光忽隱見吾意俱飛揚  
醉月蒲萄酒凌風薜荔裳客能聽鳳曲三歎楚人狂

其三

物色此亭抱塵踪一逕分席移松頂月衣染石心雲  
坐會鴻蒙意行堪鹿豕羣誰應歌古調夏木起南薰

其四

樓臺舊選地，碣石新談天。我輩無長夜，人間有少年。  
狂能倚樹飲，醉欲藉苔眠。不去非投轄，清光殊可憐。  
送孫子升下第南還

匹馬塞雲飛，離尊駐夕暉。醉題黃鵠賦，愁擁黑貂歸。  
世事堪浮海，生涯且釣磯。無將卞和淚，容易濕征衣。  
重過張氏園

勝地還能到，登臨見客懷。水侵曾坐石，苔蝕舊題厓。  
萬竹鳴寒雨，孤亭破夕靈。茫茫一宇宙，誰得問吾儕。  
有感示子相元美

歸路仍羣盜，生涯僅此身。興來能就汝，事去肯因人。

白刃無先後，黃金自鬼神。壯心銷欲盡，祇是未聞

聞同年王錢二令尹相繼死賊中作此哀之

湖海紛羣盜，朝廷失此賢。旄頭終衛漢，匕首不歸  
燕。時命七哀裏，聲名百戰前。亂離諸父老，無處泣風  
煙。右王常熟鈇燕人

急難千夫長，淹留百里才。未論吾道拙，已是壯心摧。  
血鼓江濤立，魂先楚賦來。延陵掛劍者，不獨爲君哀。

右錢江陰錞楚人

夜過子相酌中大雨

野性堪何適，清尊此復開。所經花歷亂，依舊石崔嵬。

繫馬塵氛遠披襟風雨來昔遊曾幾日流景重徘徊

冬日即事有感四首時揚仲芳員外坐劾嚴相誅

九錫恩逾厚三章法漸新人皆危就日我亦畏看春

景物千秋淚衣冠萬死身何當謝塵網高枕漢江濱

訪元美寺中因留宿

馬首青山合藤稍紺宇通法輪迴斗氣仙梵出松風

酒至諸魔散詩成萬象空上方今夜月能與故人同

被謫

春風殊黯澹逐客鬢如絲國事諸公在文章異代悲

向來何駿骨此去但鳴皮不灑窮途淚還能適九夷

東黃亨夫給事

落魄無勞歎惟慚負 聖明小臣宜得罪古道不成

名爾去招梅福予歸弔屈平向來鷹隼意敢復向人

鳴

風雨

風雨來何驟乾坤迴自愁看春殊未已一夜薊門秋

馬首黃雲立天邊紫氣收何人虛按劍白壁不曾投

初發潞河

萬里浮湘去扁舟莫滯淫青雲燕市隔白日潞河陰

已盡憂天淚非無戀闕心何人問三宿吾意久浮沈

泊獨流河

萬里南浮客愁心與逝波地將燕趙盡天入鼓鼙多  
急榜驚鷗鷺深村掩薜蘿片帆何處落風雨獨流河

董生祠

萬木廣川村蕭蕭古殿存高粱蟠海氣殘碣臥雲根  
日月黃河逝文章漢代尊卽看荒草色猶似未窺園  
臨清胡倉曹招飲分署池亭

地已風塵僻亭當海岱餘深松留繫馬曲檻倚看魚  
落日千花暝涼雲一榻虛那知仙吏署亦似野人居  
同子與散步河上

野岸停孤棹因君慰寂寥微吟楊柳出散步海天遙  
沙氣蒸新暑風聲折晚潮不須憐去國恐使客魂銷  
席上贈朱邦憲還松江

萬里歸吳棹尊鱸秋欲殘美名詩律就狂態酒杯看  
贈汝惟蘭佩還家且籜冠但愁分鷁首烽色大江寒  
將別子與作

我自哀羣盜君猶繫老親艱難分道路生死定風塵  
一片論心地千秋去國身中原二三子何處不傷神

濰河候舟

此行心屢折騎馬問津還只尺符離道迷茫濰水間

浪中寒白日樹底暮青山一片風帆影飄飄不可攀

抵家

故里三秋色明時一逐臣可憐搖落候猶保亂離身  
有酒兄相慰無家婦頗嗔如何歸夢破茲夕轉傷神

樹德宗侯所對菊

入戶千株菊無株不可憐露枝分側帽風葉巧當筵  
晚色羣芳避秋陰此地偏落英食不盡蕭瑟楚臣篇

用晦池亭夜遊

進艇蘭池曲行厨竹逕深杯中倒河漢鏡裏坐秋陰  
一破論文癖彌堅好客心夜長不知倦涼露滿衣襟

夜集

不有杯中物其如萬態何浮雲雙眼盡明月此亭多  
選地移初席分曹出豔歌主人終夜興平樂未應過

送朱文學赴剡令

數載甘微祿諸生擁帳看祇今仍領縣未復負彈冠  
雙鳥漢庭下孤槎剡水寒如君能製錦勿謂世途難

柴桑

立馬柴桑里踟躕叩隱淪村荒但松菊地僻少風塵  
山水題詩意乾坤嗜酒人吾當老廬阜應卜爾爲隣

登天池



聞有上方勝乘春遠叩關雲霞標古屋日月鏡空山  
菩薩牽枝出仙人馭鹿還不妨予載酒一醉斗牛間

宿依仁寺

何處非塵境茲方卽化城閣披雙樹起鐘度萬山鳴  
一臥高僧榻殊忘拙宦情未須重證聖生滅總無名

宿赤烏觀

木落空山裏蕭然古法堂何年黃鶴去此地赤烏翔  
劍色澄秋水鐘聲散夕陽應悲宦遊客騎馬逐風霜

立秋夜對月

不厭清齋臥其如節序侵天風飄桂魄井露下桐陰

暑未辭團扇秋偏入素琴不須搖落盡先老逐臣心

秋日匡山三首

倚伏誰能測千秋合自盟大名非我有往事亦人情  
月借銜杯色江懸伏枕聲豈應遷客夢容易到神京

其二

采采涉江去芙蓉秋水寒如何雜佩色難共美人看  
灑淚題雲錦含情束素紉不知彭蠡鴈曾得到長安

其三

海內同心者秋來意愴然風雲俱失策山水信無弦  
月落九江夜星分五嶽天相思無限淚不敢傍人懸

答用晦

問訊南州使春來日醉鄉詩成吾亦畏年少爾難量  
百卉驕新雨孤亭抱夕陽不知章水上誰共拾芬芳

方回山莊

愛爾幽棲處尤宜避暑來圖書偏狎客景物解憐才  
岸幘花間出肩輿樹杪回吾將枕流臥莫令酒籌催

卜居五首

畏途何日定歸臥且江邊選地差容膝為墻但及肩  
客攜問字酒兒乞作碑錢入夜長安月猶從枕畔懸

其二

庭堦不盈尺種樹欲為林衣桁苔能上書籤露亦侵  
窮工遷客賦僻稱野人心此意即山水無須託素琴

其三

學仙猶未得頗亦好樓居小築眠堪穩高臨望獨舒  
地連雲夢澤窻入斗牛墟便欲招黃鶴遨遊任所如

喜雨東林使君

六月苦不雨三農幸有天已疑枯瀚海忽作潤桑田  
畏日原吾意為霖藉汝賢遂令消渴起舒嘯北窻前

周太守虞參軍載酒餞予郊外賦此為別

雨過羣山媚鶯花對酒新如何遠遊子負此故園春

於世真無補之官却爲貧諸君但強健蚤晚共垂綸  
渡濠梁

復作浮淮客中流意黯然冰痕城上落沙磧浪中懸  
行色催看劔歌聲起扣舷鄉書千里外隔此又誰傳

酬吳峻伯督學

天造論文地心期握手前嶽雲衣上立海日鏡中懸  
三月任城酒千秋梁父篇深知倒屣意不爲濫竽傳  
夜同張肖甫吳化卿集黎惟敬所得棲字

欲問武陵谿桃花路已迷未能成遠去何敢厭卑棲  
紫塞胡烽入青雲苑樹齊不辭杯更把重惜年難攜

過子路

五

由也千秋事一丘遺至今可憐聞瑟日先識結纓心  
碣臥樵知避臺荒客更尋蒲人思舊政風雨泣秋林  
至歸德

過采心初穩遊梁賦豈工一官遷謫老三黜古今同  
臺榭臨河曲衣冠近洛中難將賈生淚重灑漢王宮  
天寶觀題

未悟長生訣停車問息機鼎湖龍欲下緱嶺鶴曾歸  
霞色封玄圃香煙入紫微種桃人不見殘碣臥斜暉  
冬日用汲園見梅

正喜梅初放翻驚歲欲闌影踈宜避雪香細忽生寒  
春事杯中得鄉心笛裏殘偶同何遜賦還似廣陵看  
晚次柘城

入市疑村落荒隄遶白沙河吞株野盡城逐柘溝斜  
暝日踈煙火春風緩物華微官已素食問俗轉堪嗟

再詠盆荷

河上雨新霽案頭荷始花納涼非選勝散吏卽休衙  
曉蓋團珠露秋房挺赤霞欲乘蓮葉舫隨意泊天涯

朱氏山亭

駐馬叩林扉攜壺上翠微逕蟠千樹入亭俯百泉飛

掃石爲禪榻留雲結客衣徘徊託心賞不是醉忘歸

春日赴閩舟行卽事

泛泛桃花渡還如過武溪氣蒸沙磧暖香入水煙齊  
老大虛簪紱山川厭鼓鼙問津何所適漁父亦終迷

王使君子薦招飲范氏池亭二首

闢圃黃華曲招遊藉使君山形飛不定花氣鬱難分  
石上揮殘雨波間醉白雲閩南多戰鼓莫令此中聞

其二

石楯扶寥廓巖扃鑿杳冥細尋苔逕入不放酒杯停  
壁欵千花麕池涵九曲青清商歌朱闕衣袂落羣星

訊丘鳴周光祿

往時金馬客侍從有詞名倉卒青山計支離白首情  
避人心轉畏懷主夢猶驚東海何難決頻年未洗兵  
寄題陸廷尉道函吏隱亭

怪是趨朝日偏餘在野心避人開徑小取意著花深  
池寫西山色亭披上苑陰豈須逃紱冕然後有登臨  
舟中望黃谿山瀑布

倚棹看懸瀑蒼波十里寒玉龍飛不去銀漢瀉初殘  
響落層雲裏陰浮萬樹端幽懷一以愜合是使君灘  
黃明府七十

汝賦歸來後逍遙不問年雲霞生綠髮山水入朱絃  
晝卻籃輿走宵依石榻眠誰知彭澤令卽是武夷仙

重過南浦用晦攜酒出訪共賦文字

爲憶章門別停驂一問君倒衣乘岸月載酒踏江雲  
岐路予將老詩篇汝不羣請看舊彈劔猶自錯星文  
重過劉文輝山第

驅馬南仍北三年此再過石門幽不改花逕曲無多  
解榻延風雨開樽面薜蘿亦知君好客其奈旅情何

過孔子河

相傳孔子自楚返蔡經此楚人困以名河

夫子南遊後山川不可名問津千古事環轍至今情

言集卷二  
雨洗沙茸淨波吹石髮輕惟應楚孺子下馬濯塵纓  
道逢梧州錢使君叔美竝駕北上次長潭阻雪

命酌旅舍歡然賦此

使者蒼梧至逢予亦遠臣追隨瞻日月迢遞領風塵  
馬怯西陽雪衣遲漢苑春且拚村釀醉莫遺客愁新  
小除日同惟敬楨伯夜飲約卿侍御所分得多

字

畏路難投足情親此再過客從燕市蒲詩奈楚人何  
燭吐椒花焰杯搖琥珀波明朝歲且盡白髮較誰多  
熊元乘繼至同順甫再過

何意參辰後相逢又帝州旅情三楚合別淚一時收  
月落仍呼酒霜寒亦解裘升沈俱往事遮莫歲如流

除夕與劉伯良文學坐談

逆旅憐吾病相依度歲寒幾時捐藥裹茲夕共辛盤  
禁漏催春至宮雲候曉看明朝薊門柳應似發江干  
再經汝南訪張子畏留酌分得樓宇

歸思春無那停騾是舊遊風塵雙敝屣江海一虛舟  
且載平輿酒重臨懸瓠樓醉看楊柳色宛轉向人愁  
夏日攜壺登西塔寺同君敬季狂避暑共賦迷

字

近塔雲無際聞鐘寺轉迷  
屢窮山樹杪忽出海天西  
臺俯羣峯盡樽從二客攜  
吾將謝河朔消暑臥招提  
發芋原驛

迴舟芋原浦落日大潮生  
雪滿窻中嶼天懸海上城  
山川含殺氣風雨入秋聲  
獨有孤雲色能憐萬里情  
發自劔浦山行入樵川卽事

萬山懸古驛云是越王臺  
駐馬桐陰合憑軒海色來  
兵戈遺勝迹鐘鼓發餘哀  
只怪前溪水東流不復回  
郡齋與莊則勸夜話

異域今何夕同袍自少年  
蹉跎懷古意激烈送窮篇

下榻山雲到當杯海色懸  
何曾悲老大紫氣拂龍泉

送則勸還題

馬度閩關險鴻驚楚塞長  
故人何遽別羈旅益堪傷  
醉裏孤城月行邊萬樹霜  
憑君寄雙淚一爲灑江鄉  
登丹臺同君敬作

樹遶荒臺合山憑曲磴扶  
負城開玉案傍井覓丹爐  
一眺人今古長生術有無  
諸峯如鶴立把酒爲君呼

哭二兄二首

問疾書頻往求生願獨違  
幾時同布被無地續烏衣  
淚應霜楓落心先候鴈歸  
江樓虛在望花萼少相輝

其二

迢遙江漢水嗚咽不勝情  
庭掩三荆色途悲四鳥聲  
繫縷腸屢斷伏枕夢頻驚  
一夜空齋裏居然白雪生  
除夕郡齋同君敬守歲  
分得人字  
海鄉還此夕童僕具盤辛  
短燭分殘臘深杯借早春  
歌前愁不遣坐後髮能新  
只怪千門柳先窺萬里人  
七臺寺五首

山水元吾癖乾坤此一區  
望峯行屢盡出石景猶殊  
鳥獻無名果龍銜不夜珠  
浮雲夾飛閣跌坐卽毘盧

其二

令郡無奇事看山一杖藜  
羣靈趨紺宇萬樹折丹楹  
啓戶雲先入登壇晝亦迷  
何當謝塵鞅日臥海天西

其三

鳥道青冥鑿龍宮絕壁銜臺支  
五色石僧老百花巖  
呪雨傳空鉢斲雲腰短鏡  
何年佛出世靈氣入松杉  
其四

一柱虛無力羣峯次第飛  
芙蓉開佛座羅薛掛僧衣  
海月傳燈過巖雲作雨歸  
怪來稱福土無自著塵機  
其五

無復人間景兼之我輩遊  
試憑真法界一覽大神州



雷雨山腰過星辰石上流武夷三十六差足擬丹丘  
九日登高山同顧沈二山人宴集

欲縱三秋目同登萬里臺山空木葉下天盡海雲來  
白髮慚簪紱黃花戀酒杯留歡興未已蕭寺暝鐘催  
除夕

故鄉仍寇盜歸計復蹉跎病借殘年遣愁爭此夜多  
敝袍占氣候長劍倚星河明日城南柳青青奈客何

宿順昌

三舍昭陽道其如風雨何白雲春望人芳草暮寒多  
造次停車騎蕭疎向薜蘿山城更漏永欹枕問明河

同丁庸卿水口泛舟得山字

爲君留信宿溪上坐青山雙楫安流下孤雲返照還  
時情都眼底詩態豈人間倚醉看遙海扶桑擬其攀

沈山人買妾

海日懸歸路何當去復疑琴能挑卓女舟似載吳姬  
醉擬高唐賦行歌白苧詞桑間逢舊婦莫以鬢如絲  
夏日同趙汝脩閣上人登凌虛閣

與客來消暑逢僧竝叩關樓臺支一柱鐘鼓落千山  
薄霧平城湧孤雲逐鳥還憑闌悟空色結社偶人間

與四兄言別二首

憶弟來何暮攜兒去正秋海風懸落木江鴈領歸舟  
止是傷離別非關怨滯留樽前數行淚難與夕陽收

其二

不道輕千里雲山海上看鼓囊星拂劍搔首雪盈冠  
歸興先秋發離歌入雨寒江鄉正羣盜何處可投竿

袁明府南園夜集

五柳門初闢三花石竝幽地分烏坂勝池引鶴溪流  
已足逃仙令尤宜醉隱侯攬衣雲壑外清夜獨遲留  
德甫用晦載酒訪予石亭館因屬以小居之事

旅思憑江館三年此一樽關山來楚客風雨暗章門

短髮今無幾新詩敢自尊移家好相傍豈復礙乾坤

至日大冶縣作

命駕纔三舍吹葭又一陽髮華霜耐短愁緒日增長  
暖欲回山縣春先動帝鄉遙應周太史重奏五雲  
祥

陳廷評玉叔康山人裕卿夜過席上得工字

臥雪春初霽看雲暮已空物情歸塞馬吾意在冥鴻  
得客窮相慰論詩老未工却愁岐路隔無復此樽同  
西平遇程近約使君夜談

何意巴西客還於汝上逢江山千古思車馬一時蹤

促膝移寒漏微言解病容明朝許昌道聯轡閱嵩尚峯  
奉送龐中丞巡行五路屯鹽

自昔邊難實誰稱虜易攻限田非漢制煮海亦齊風  
策借農桑晚憂懸社稷同可知蕭相國飛輓定元功  
留別陳太史子錫陳廷評玉叔

一葉南天下含愁自上林不妨投異俗何以報同心  
海鴈將書遠宮雲入夢深樽前薊門柳惜別故陰陰  
夏日庭卉初集二首

逕僻塵踪遠庭空暑氣微移花新遶砌待雨獨披衣  
石上虬龍舞枝間燕雀歸蘭芬挹堪飽何用北山薇

其二

落日下庭柯幽懷奈爾何捲簾蒼藹逼移席暗香多  
天意從踈放兒曹狎笑歌向來青鬢色虛逐畏途過  
齒病自嘲

自結談天舌虛含齧雪心乾坤妨吐納風雨助呻吟  
肉食慚無補脣亡慮轉深甘同犬馬老藥餌故難任  
桐江哭羅太史

斯文元不沒夫子竟何之馭鶴應無意傷麟獨此時  
雲封內史宅江遶大儒祠有詔求巖穴誰爲帝  
者師

中宿峽

夾岸千峯合中流一葦通經過憑絕險疏鑿自神工  
濺瀑成珠海飛巒掛蕙宮蛟螭莫相訝匣裏劍光雄

宿石門山下

越南星是客海上石為門欹枕潮初落停撓月已昏  
戍煙連絕島漁火閉深村野哭聲何自偏銷萬里魂

望海

望海天無際登樓亦壯哉蜃隨春霧散雪擁暮潮來  
六闕支鼇背千珠吐蚌胎聊舒萬里目長嘯起銜杯

病中答曹有卿參政

自失中原路夷猶瘴海邊病依山鬼臥窮得故人憐  
白髮親蠻俗丹心老戍煙南征有銅柱誰紀伏波賢

楊別駕署亭小飲

隙地纔如掌栽培擬茂園峯陰隨卷幔海色到憑軒  
急雨澆花過歸禽掠竹喧坐來幽意愜潦倒任芳樽

過李明府西岸竹亭

飛蓋出平林停軒步綠陰不關無暑氣先自少塵心  
水抱雙亭落樽開萬竹深怪來彭澤令百里厭橫簪

東齋新成即事

石上花新集朝來雨亦宜不知身萬里且得酒盈卮

笛裏聞蠻曲絃中按楚詞徘徊秋夜永烏鵲浪相疑  
立秋東齋夜坐

不道秋期至猶然暑氣重關山流海月河漢隱邊烽  
署倚枕榔闌盤兼苜蓿供總勞書越絕萬里一浮蹤  
七夕東齋與二客對雨

七夕偏逢雨雙星莫渡河人間怨機杼天上阻風波  
對酒青楓落看雲白髮多乾坤俱逆旅何處獨悲歌

重泛鑑江

竝有滄洲興寧辭載酒頻石門雲氣落沙磧雨痕新  
砧杵千家思兵戈萬里身幾時蓮葉舫江漢坐垂綸

哭熊元乘中丞五首

時在潮州新破海寇卒于行間

嶺海鳴朱鷺魚龍避絳騶將星那遽隕蠻霧未全收  
碑墮英雄淚天懸社稷憂角巾歸是夢猶擬赤松遊

其二

自君嬰紱冕何處不臨戎名起諸艱後心危百戰中  
南人瞻白鉞天子錫彤弓許國齊生死銅標白漢

功

其三

海色凌霜府秋陰向夜臺軍符仍氣象藥裏竟塵埃  
部曲吞聲散朝廷拊髀哀潮陽十萬戶猶憶誓師

來

臘月署中見桃花

海際天無雪春前桃已花披軒疑錯錦泛酒忽成霞  
物候三山異鄉心萬里賒明年武陵渡何得遂移家  
電白南樓望海

一縱登城目蠻煙百粵通斷山橫絕海孤閣倚層空  
地撼蛟龍鬪潮爭鼓角雄憑軒獨舒嘯萬木起悲風

題黃公補漱芳亭

疊石分三島登亭欵衆芳星垂朱實亂雲掛碧蘿長  
把酒迎清籟披衣入暗香此中宜得句歌發向誰狂

夏虞卿邀過梁氏園留題

不識西園勝因君秉燭過檻隨江岸曲堂抱水雲多  
百卉延書帙羣星散薜蘿松間涼籟發彷彿聽弦歌  
重遊七星巖

夙有看山癖茲山況不羣郊原青黛合霄漢紫苔分  
壁暗吹陰雪崑虛宿古雲總無塵跡到卮酒坐斜曛  
得歐楨伯文學光州書

拄杖行山麓攀蘿啓洞扉坐驚雲石變觴挹乳泉飛  
鶴立仙人鏡鯨翻織女機丹爐不復焰猶有紫芝肥  
珠江舟中與戴使君夜談

江海茫無際扁舟二大夫暮雲依島嶼寒雨散菰蒲  
對酒商歌發看天旅思孤豈無千里意相顧老窮途

與唐寅仲秀才

可怪唐寅仲儒冠漸白頭峯雲高自臥海鳥仲相求  
一識三閭賦能輕萬戶侯知君久懷壁偃蹇向予投

厓門弔古二首

宋相陸秀夫負少帝昺沈死此石下

王師二十萬海戰不曾歸獨有厓山石能憐宋事非  
中原趨左袵南越竄朱衣辛苦諸賢佐荒祠倚夕暉

其二

千尺厓門浪前朝恨未平總無恢漢力猶作撼胡聲

社稷餘三傑興亡自兩京至今東海日如吐赤心明

三傑謂陸秀夫文天祥張世傑也

酬沈嘉則二首

絕域無鴻到傳書海色驚流言予未省孤憤汝難平  
老漸安殊俗窮堪避盛名論交滿天地誰及布衣情

其二

方外論高義途窮見汝賢淚緣思舊盡文借解嘲傳  
一諾無金石羣情任歲年浮雲行萬里相望獨依然

賀許孟中生子三首

紫氣從天日氤氳度越臺月銜珠蚌吐雲護玉麟來

何客知英骨他時自異才一經行有託且進掌中杯

其二

孔釋如期送崧神異代看百年家造起一日旅愁寬  
侍子裝文祿嘉賓獻繡鞶光輝映扶木不數謝家蘭

其三

抱子無言晚傳家亦有神渥注龍種異丹穴鳳雛新  
適意忘羈旅函書慰老親門庭詩禮足何用卜芳鄰

除夕戒嚴

黯澹思鄉淚蹉跎許國身路迷猶作客歲改不知春  
鸞鳳棲何擇豺狼擾未馴東風發楊柳一夜與愁新

元日南城樓閱戰二首

望闕雲初霽馮城霧尚寒戎衣關歲運羽檄妬辛盤  
旗影烏蠻合兵威赤壁看裸夷宵未遁何日枕能安

其二

盜密真如雨城孤幸有天妖氛迷白日戰鼓入新年  
技欲穿楊試功難破竹全晚來收一捷父老拜烽煙

江大叅李兵憲枉餞三橋驛奉謝

暝霧褰帷合春雲擊軫來壯心橫絕海戰色起荒臺  
樽俎非常遇經綸竝異才長當萬里別那得不徘徊

酬朱邦憲見懷二首



白首堪長別書來更愴神一官身是夢百戰鬼為鄰  
竊祿何奇事關心獨故人秋風三泖畔誰共飽鱸蓴

其二

任俠名差著違時謗亦流剖心明楚壁側目視吳鉤  
酒泛滄江暮歌回白苧秋只憎招隱處不入剡溪舟

題石處士一谿草堂

石脉分泉細村流遶屋長數峯沈紫翠一勺寫瀟湘  
星隱磻谿釣花飛曲水觴夜深雷雨過應有伏龍翔

蔡景明僉憲招飲分署池亭同子與賦二首

密樹藏孤榭方池鏡遠天磯分黃鵠細盤鱸錦鱗鮮

景物來三楚風流起二賢不禁幽意愜枕石梁眠

其二

漣漪風不定倚檻獨徘徊石作支機穩池方濯錦開  
暮雲留下榻新月待銜杯媿我非高士能從孺子來

少司徒姜公岳陽樓餞送

夜堂酣未解載酒復登樓風雨驚長別江山戀舊遊  
天空萬葉下日落片帆留何事姜公望能忘上國憂

集新橋館

遶閣雲如水入門山滿堂煙霏生牖闥空翠滴衣裳  
石暝猿猶臥松高鶴正翔居然成野趣不解是他鄉

茹工部禮卿園亭對雪

客有山陰興無妨雪逕迷遶亭花莫辨當檻竹全低  
獨鶴衝寒舞羣鳥傍堞棲遠山看不夜那惜醉如泥  
同諸大夫宴汪評事江亭二首

刻榭憑江勝羣公結駟來逕隨花石遶筵接水雲開  
雪乳浮丹洞晴沙護釣臺隔林峯在戶五柳不須栽

其二

愛客興未已一樽移放舟松篁披絕岸簫鼓發中流  
月跨銅標上春隨錦纜收却看回棹處猶似剡溪遊  
同林仲清憲副飲石蓮峯頭

愛芙蓉石披衣到絕巔一峯青自削千葉翠相牽  
仙杪行杯出雲心擲杖旋不妨風雨過酣傍列星眠

夏日同諸大夫東亭觀蓮

淥水依城細紅蕖近寺幽風亭全辟暑露蓋欲迎秋  
錦奪珠宮豔香凌玉井浮東林如可社日傍遠公遊  
題呂仙圖贈周使君

豈是邯鄲枕能令悟太虛雲霞偏異骨木石總天居  
百鍊昆吾鏢千言道德書請看箕坐處猶似朗吟餘

偶過茹園再贈

古水蔽城闔藤蘿罨四鄰閉門成野趣呼酒見天宜

重過飛雲洞

密樹蒙丹穴虛巖俯紺林重來幽絕境一暢遠遊心  
石與雲飛動潭涵月古今風生靈籟發故作老龍吟

王母洞

虎牢爭戰地何自有仙關石穴藏符籙瑤池落珮環  
偶乘青鳥至時駕彩雲還欲受長生訣無從遇玉顏

登絃歌臺

天地有通塞斯文無古今不緣陳蔡厄誰識聖賢心  
臺迴黃河曲沙荒白日陰絃歌欲盈耳何處起知音

過子由亭

在陳州西湖中

飛蓋遶林垆浮香十里汀却移花外舫同醉水心亭  
返照荷爭碧迴波岸轉青相傳蘇仲子寂寞此談經

送吳京兆赴金陵二首

京兆非常秩 天王寵異才誰為馮翊重合有趙張  
來隼旆移中嶽麟符出上台金陵龍虎氣此日更崔嵬

嵬

其二

王氣無南北黃圖自二京君從高第入天老重臣名  
問俗江湖遍承風輦轂清可知分陝日周召亦同情

題伯榮宗侯竹居

弱冠明經術端居萬竹幽爲耽淇水靜不作菟園遊  
翰墨雲生石弦歌月滿樓請看劉子駿何忝漢儒流

雪夜宴劉右史宅

興發天宜雪兼之訪戴過不拚長夜飲奈此白頭何  
燭下陽阿舞絃中激楚歌空庭月未上玉樹總婆娑

賦得名駒贈方元素

何來天下馬一顧卽長鳴未試千金足先收萬里名  
練飛閭闔影珠汗渥洼精芻秣恩難報寧辭塞外行

重過黃園

辟徑從吾好紆車不厭頻雨苔青漸合風篠翠初勻

興與花神狎情偏地主親當歌雲似雪何異郢中春

松月樓

自是梁園勝登樓玉宇開間憑松頂坐忽擁桂輪來  
星漢流書牖風濤送酒杯此中曾授簡何客似鄒枚

花間偶評二首

爲解花間意樽醪日自呼興來佳客就酣至小童扶  
雨葉從沾灑風香忽有無一區聊自廣何用策脩途

其二

名卉無多種新移卽故林如雲供坐翫永日助行吟  
宛轉留春事參差散夕陰何妨問奇客載酒數招尋

莊則勸過訪二首

三徑從吾好此生君所知酒杯如可放金石亦堪疑  
遶席花如綺垂頭鬢已絲惟應共貧賤不負白雲期

其二

棄擲吾何有藏身萬卷中君來長日語興至一樽同  
況有雲霞癖都無禮法攻羣花款相媚涼雨忽濛濛

郭憲使篤周見訪

南海探奇日逢君意氣多那知乘月舫亦復叩煙蘿  
握手羣峯峙論心一雨過不煩驚往事吾道自江河  
則勸以朱魚十數頭畜之孟中見遺武謝

洋洋一盃水不減放生池戲藻金鱗躍分羣火鼠移  
總無驚餌態寧有報珠期濠上逍遙者惟應惠子知

同張羽王登山見紫芝獨秀喜而采之

不淺攀躋興春山雲氣平偶隨青羽蓋重采赤芝英  
入掌明霞豔沾衣瑞露輕商山浩歌者千古著芳聲

舍傍小亭初成卽事二首

環堵不盈畝營亭且避喧屢移花近席新長薜垂門  
病借銜杯遣身從失勢尊自今容膝處豈復礙乾坤

其二

爲草遺榮賦園居興轉新短籬常自掩凡卉亦堪珍

坐久雲霞變機忘鳥雀親攬衣時抱甕不添漢陰人  
泛西湖

十里西湖勝錢塘未遠過水痕侵錦石峯影鬱滄波  
進艇隨鷗鷺銜杯入芰荷晚風生谷口清切送漁歌

登鍾成山觀

壑擬藏舟僻山同覆釜圓偶來探異蹟便欲躡飛仙  
瀑外流雲合松梢落日懸嘔霞蒸石鼎疑吐晉時煙

泊舟梧塘聽泉

繫舟深樹裏箕坐聽鳴泉西約黃金珮淒清白雪弦  
千山都雨意五月已秋天心境杳然寂誰稱洗耳賢

林間小飲

山中暑氣薄况乃竹林幽與客宜深入登高當遠遊  
稻花風向午桐葉雨驚秋醉臥依田叟真堪散百憂

詠螢火

微命托腐草吐光疑夜珠飛揚但咫尺明滅何須與  
遶戶作星聚入林驚雨驅凌晨不自照海日升東嶠

聞田歌

隔隴田歌發洋洋振碧空調高無郢雪思遠卽幽風  
鼓腹聲相答明農意許同何當租吏緩與爾待年豐

西濟晚棹

一水南湖外透迤白石門鳴榔穿曲澗排苐入深村  
萬樹中流合羣山落照昏正愁高興盡漁父過清樽  
避暑小室

一室幽如洞炎威總不侵兼於塵事絕益戴主恩  
深簟擁冰紋細簾回晝色陰拋書轉岑寂倦臥枕鳴  
琴

立秋後三日泛舟

秋陽何大烈况復近煩囂一泛煙波去俄今暑氣消  
晚風迴奏笛涼月過鳴橈醉擁羣山臥真同河朔招  
喜雨東楊使君二首

賦暑毫方禿納涼樽屢虛行吟楚澤畔消渴茂陵居  
雨意朝來足炎威坐自除郊原諸父老歌擁使君車

其二

不是爲霖客誰能請雨來馮夷清大道神女下陽臺  
隴黍含膏吐庭花作意開直驅殘暑盡湖上好銜杯  
李文仲過訪

汝自茗溪發言循楚嶽遊片雲將敝舄高浪翼輕舟  
野服驚相顧新詩款見投但須傳郢曲不必報吳鉤  
秋夕同徐懋弘戶部登寂潭寺

寺與高雲竝僧疑異域來天空潭影淨月上野煙開

殿角垂星漢林心擁石臺坐中誰問偈秋色萬峯迴  
秋日湖上雜詠六首

湖水秋仍漲鷗羣日以親歲時諸酒伴身世一漁人  
擊汰峯紋亂凌空月魄新山川從所適但醉莫言貧

其二

野望晴偏好江行晚故幽總於朝市遠散盡古今愁  
鳥鴈紛前渚蒹葭忽蚤秋由來范夫子先繫五湖舟

其三

鷺立湖心石魚吹浦口莎數峯排霧出一葉信風過  
落日殘紅蓼新霜變綠荷客星從耿耿無復照煙蓑

其四

棄擲身偏穩行遊性頗真棹隨城宛轉波湧石嶙峋  
樹裏千家暝雲邊百雉新芙蓉行自采秋水故精神

其五

謝客安離索招攜但酒徒霜林森橘柚雪浪隱菰蒲  
不減歸吳興如披入剡圖一樽歌裏盡百感醉中無

其六

為愛湖光好朝朝坐不歸環山皆酒案得石定漁磯  
露下青菱熟天空赤鴈飛流年莽推斥莫惜典吾衣  
與茂承夜談



詹仲淵詩集卷二  
不憚長江險相求到石門九秋寒雨夜千里故人樽  
放逐偏吾道漁樵竝主恩歡來病欲去萬事莫須  
論

喜孫兆孺過訪

風雨秋期暮君來自洞庭豈從真隱處猶測少微星  
短髮驚相弔深杯喜莫停放歌俱楚調流響入青冥  
呂相國枉過小宴

大道衣冠集爭迎上相歸何當紆屬駕先自訪巖扉  
野服塞蘿薜山盤進蕨薇一樽申契闊花鳥亦忘機

植女貞木一名冬青

爲愛華林種雙株手自移試看羣卉色誰比萬年枝  
映雪浮蒼靄先春發異姿從來貞女意獨有歲寒知

初夏文錦閣對雨二首

晏起臨孤閣軒空暑氣清湖添新水漲峯入亂雲平  
薜荔高連屋魚龍近狎城中芳樹色流睇不勝情

其二

古木寒煙集方塘野水侵積陰常蔽日環堵自愁霖  
黯澹憐芳草微茫辨遠岑樓居一高視天地總浮沈  
王行父同廖珍之君直俞本之見過文木園小  
飲時兩兒在侍行父有作賦此和之二首

小徑偏佳客初筵但濁醪石隨簾出沒花與席週遭  
共戀朱明景兼聞白雪操病夫先怯醉投轄任兒曹

其二

自喜逃名去何期問字來辟人甘學圃留客與登臺  
花石供幽興風雲待異才侍童諳楚曲聊以送餘杯

夏日同莊則勸程萬里暮泛北湖

五月仍春服江平雨乍收客懷殊放浪山意亦遲留  
遠樹移新月輕雲送白鷗不知人世裏何物勝滄洲

與則勸萬里飲石蘭橋

欲覓浮觴處村流澗見侵且憑橋石醉更覺野情深

片雨懸高隴飛泉出茂林不煩操綠綺二妙已知音  
讀羽王萍浮集因贈之

駿骨虛高價羊腸自畏途枕書長日靜吹劍落星孤  
武庫才難盡文園病未蘇令名兼達宦須信古來無  
晚過通真觀訪載道

愛此斜陽色偏於雨外驕暝煙澄古觀霞彩霽長橋  
水擁金銀闕山披雲霧綃正須吾與爾掃石話漁樵  
仲將明府自山莊移居西郭外不遽見客作此

簡之

巾車已入市猶自厭逢迎背郭新營舍臨流便濯纓

官貧餘舊業機息悟浮名花底盈樽酒何時共汝傾  
同徐懋誠飲石蘚亭作

園荒久不涉花落漸無多與客攜樽入驚秋奈老何  
蘚痕侵戶牖蛛網蔽藤蘿只似行吟處重聞孺子歌  
同羽王攜酒邀汪方二山人泛舟二首

載酒出林垆江光忽杳冥旋移青雀舫故近白鷗汀  
野景殊難敵深杯莫放停坐看山霧暝波上湧羣星

其二

城居忽不適雲水一追歡却借羣山色聊供二客看  
淺沙分燕口高岸束鴉灘蕩漾舟前月真疑夜雪寒

通真觀訪惟一因與步過北園

小圃隣仙院平分野色幽偶攜蓬觀客來作竹林遊  
蹊逕填丹葉茅茨帶碧流無須著亭榭已可當玄洲

冬日與仲美對菊

菊花何大傲歲晚獨含英一夜迎寒發繁香遶屋清  
却持霜後色來助酒邊情醉眼仍相媚流光忽自驚

宿楓林寺

竹塢新停雨楓林未受霜門延青嶂入寺與白雲藏  
細籟調清梵輕煙吐妙香總於人境絕高枕悟明光  
舟夜聞鴈有懷

寒鴈起何處悲鳴夜未休已忘闔塞遠猶畏網羅求  
江樹隱微月野雲平古丘潸然思舊侶天地一漁舟

楊使君攜酒枉過北園

學圃安吾拙何當遇使君紆車臨水石載酒酌松雲  
野色孤亭合林霏一鏡分只憐侵坐處梅落故紛紛

冬月與外美權

小圃觀山到平公理台幽靜謝靈運客來竹石林

甌甌洞藁詩集卷二終

